

## **ASO TOFI, 11 FEPUARI 2021**

*Na nofoia e le Sui Fofoga Fetalai le Nofoa i le itula e 9:22 i le taeao e tusa ai ma le Tulafono Tumau 27(1).*

Tatalo.

**SUI FOFOGA FETALAI:** Ou te faasilasila atu ua toe amatalia nei Taulumaga a le Fono Aoaofa Fitolafono.

Ia, o upu masani a le atunuu, ua tatou feiloai a ua i alo e pei o le tala e fai i le Tei o Tupua. Ua to foi i tua Apolima i le soifua maua ma le lagi e mama i le paia o le Palemene i lenei taeao. O lea ua maea ona sula le agalelei o le Atua e tusa o Lona alofa ma Lona faamaoni i lana fanau.

E faafeiloai atu i lau Afioga i le Taitai o le Maota, lau Afioga i le Palemia, Aiga Kapeneta, Minisita Lagolago, Taitaifono o Komiti Faapitoa, Komiti o le Palemene, le paia o le Palemene, aemaise foi Ofisa Sili o Pulega o Matagaluega a le Malo ma Faalapotopotoga ma le aufaipisini ae faapea foi lau Afioga i le Failautusi ma le Ofisa o le Fono Aoaofa Fitolafono. Malo le soifua, malo foi le usu.

### **TULAFONO TAU FAAOFI O LE FAATATAUINA O TUPE FAAOPOOPO (NU.1) 2020/2021 – felafolafoaiga faaauau i luga o le faitauga faalua – Aso 17**

**SUI FOFOGA FETALAI:** E tolopo Galuega a le Fono Aoaofa i le aso ananafi o lo o saunoa le sui usufono mo le itumalo faaalaalafaga o Palauli le Falefa.

Ma le faaaloalo ou te tapa le sui usufono mamalu, ia tulai mai e faaauau lau saunoaga, e pei ona i ai le matagofie i le aso ananafi.

**Afioga Hon FAUMUINA TIATIA FAAOLATANE LIUGA (Palauli le Falefa):** Faafetai i lau Afioga i le Fofoga Fetalai. Ia, e manaia lava le faalaulau mai pea o suafa matai o le sui usufono lea e tulai leaga o la e faafogafoga mai po o ai le sui usufono mo Palauli le Falefa, ae manaia lava leaga o la e faalogologo mai si o tatou itumalo lau Afioga i le Fofoga Fetalai. Ae ui o lea, e le o ni ai e aveai ai. Faafetai o lea ua e toto le niu i le tuaoi...

**SUI FOFOGA FETALAI:** Ia, se i toe faamanino le mea lea i le sui usufono mamalu. E tusa ai o a tatou Tulafono Tumau, o le taua o suafa e faaeteete i ai le Nofoa, ae afai o lou finagalo lea, e leai lava se mea o i ai pe a saunoa lava lau Afioga ma faailoa i lou itumalo. A o le agaga o le Nofoa, e puipui i Tulafono Tumau o le Maota i le tauina o suafa, ae faasuafa lava i sui usufono mamalu o itumalo o filifilia mai ai a outou Afioga. O le mea la lea, ia saunoa lau Afioga.

**Afioga Hon FAUMUINA TIATIA FAAOLATANE LIUGA:** Faafetai i lau Afioga i le Fofoga Fetalai lau tofa oe le Togiai Fagamalo. O le mea lena na ou ta... leaga o le ta itumalo la e tapuai mai, ae le afaina. O lea ua uma ona e toto le taamu teevao i le tatou va feagai ai ma le Atua, o lea foi na e faaogaina i lau talosaga le valaau a le Fai Salamo lena e faamauiina i le Salamo e 24, "O ai se e alu i le mauga o leova, e tatau ona mama lima, mama le loto." O le faamoemoe lena o lenei taeao, aua o lea tatou te talanoa i le malumalu o le Atua, o lou finagalo ma lou loto. E tatau la ona mama i mea tatou te faia. Ua faamanatu mai ia te au i lenei taeao le valaau a le Fai Salamo, fai mai e afua mai mauga manuia o le nuu. O lona uiga, lau Afioga i le Palemia, lau Afioga i le Fofoga Fetalai, Minisita o le Kapeneta, sui usufono o lenei Palemene, o lou finagalo ma sou manatu e faufau ai manuia o Samoa. E pei lava foi ona taua i le aso ananafi le agaga faafetai ma galuega sa faafoe mai lea ua iloa ai le faamoemoe o mea ua faatino ma ua manuia ai si o tatou atunuu. A lelei ona fuafua i tumutumu mauga ma aoao ai manuia. Aua afai e ao manuia lea i tumutumu o le mauga, o lona uiga, ona i ai lea o le ao e timu ma tafe mai i auvae mauga mea e ola lelei ai laau.

Tuilaepa ma le Faigamalo, le Palemene lenei, o le tatou sao lena, o nei e fau ai taeao, aua o outou alo ma ni fanau o le a omai i totonu o lenei Maota, ia pe galulue foi i Matagaluega ma Faalapotopotoga a le Malo po o kamupani tumaoti, aua so o se mea lava e fai, o lo tatou sao lena e manuia ai Samoa. O le toe amataga lena o le toe faaauauina o lau lauga i lenei taeao.

E uma le aso ananafi ua ou talanoa i le faamanuiaga o se tasi o matatia na ausia ma ua faavaeina ai le tatou Faalapotopotoga foi lea o Teugatupe Faafaigaluega ma iunite. Sa ou manatu ou te le toe oo i ai, ae pei ua mao le tala a le Toeaina ananafi, e tatau lava ona ou toe oo i ai, faapea ou te le malamalama i le mea lea ou te tautala i ai.

E fai lau tala lea i le taimi ina ua tofia au ou te vaai le Matagaluega o Tupe, na ou valaauina lea o Ofisa Sili o Pulega o Matagaluega e aumai ni lipoti e brief ai au i stages o lea vaega o le financial sector. E tasi lava le mea na draw i ai lau attention ina ua ou vaai atu o la e faaletonu, o i. Ona ou talosaga lea i le Advisor e sau e fai se ma tala. Ae aumai le polokalame, e 3 tausaga e saili ai le \$40 miliona ma le afe tagata e umia sea saoloto.

O le mea la na tupu...

**SUI FOFOGA FETALAI:** Malie le sui usufono se i tuu atu le avanoa i le Taitai o le Maota.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi (Palemia):** Lau Afioga i le Fofoga Fetalai, ua ou faauilavea i le sui usufono mamalu, o le UTOS lea sa ou tulai atu ai, ina ne i te i ua e talatala ese i tua, ae vaapiapi lava le mea sa ou tulai atu ai, ona o le UTOS o se Faalapotopotoga ua leva ona fuafua, na fuafua mai lava i le tausaga e 1972 ina ua faatu le tatou NPF, ona tupu ae ai lea o se lagona, o le a tulai mai le NPF mo tatou faaputugatupe e tua i ai le atunuu i a latou atinae, ae tua foi i ai i latou e ana tupe ia e maua ai se latou retire i taimi e litaea ai. O le taimi lea, na o le pau lava le mea lea sa i ai na o le Superannuation po o le Superannuator a le Malo o Niu Sila. O lea la sa faatu ai, e fai si mamao i tua. Ona faatulai mai ai loa lea o le manatu, e tatau ona faatu se tatou Faalapotopotoga la lea e i ai la le UTOS. O le uiga o le Faalapotopotoga, e aoao mai ai seleni a tagata e mafai ona teu ai, ona faaaoga loa lea o seleni ia, e mafai ona faatau ai e latou nei e ana tupe ia e teu i i ni sea o ni Faalapotopotoga tetele lea ua faamatuu atu i tua.

O le lumanai ai la o le faamoemoe, o le a faamatuu atu le faatauina o sea o le tatou SamoaTel, a o lea ua uma ona faamatuu isi mea ia e muamua mai, na ou matauina pea e le i faia lava le mea lea na faatu mai lava i le 1972, ae lafo mai i le Matagaluega o Tupe o latou e faagaoioia. O lea la e le i faia, a ua feoloolo nai a tatou kamupani a le Malo ua faamatuu atu i tua, e tai pei o le kamupani lea o le Faletalimalo o le Tusitala, e tai pei foi o le tatou Kamupani foi lea e Gaosi ai le Pia.

E pei la o le tulaga lena, ae faamalulu atu foi i le sui usufono, o i tonu lea sa agai i ai lou mafaufau, ou te le i talatala tele atu i tua. O lea la ua avatu le faatonuga e fai ina ua faatulai mai le faatauina ese atu o sea o le tatou SamoaTel, o le iuga a au ma le Kapeneta, e le mafai ona faia le mea lea, pe a le muai faatu se Faalapotopotoga o le UTOS. O lea la na faamalosia ai loa i luga o le faatonuga mai a le Kapeneta, e le mafai le mafai ona faatinoina le vaega lea o le polokalame lea a tatou o le faamatuu atu o aseta nei i tua a le Malo, o mea ia o le faagaoioiga o mataupu tau pisinisi, ona o le agaga foi lele e tele tupe e ono maua mai ai ma tele galuega e maua mai ai.

E pei la o le tulaga lena, o lea la ua vaai mai loa latou o lo o i totonu o le Matagaluega o Tupe, a le faia le mea lea e sau ai le faatonuga, faatino loa le mea lea ua leva ona faataoto, e le faamatuu i tua le SamoaTel, ona o le tulaga lea e taua tele mo le tatou atunuu, e maua tupe a tagata ona aumai lea teufaafaigaluega ai i i, ia, ona gaoioi loa lea o le Faalapotopotoga lena e faatau mai sea mai le SamoaTel ma sea mai lea kamupani, e mafai la ona o ai loa la nai loomatutua ia tu'i koko ia sa saunoa i ai le sui usufono ma faapea ane, o le matou kamupani lena, o lea ua i ai matou sea.

O le uiga la o lau upu foi lele, e fai si mamao i tua o le mataupu. O le talatuu faavae, e amata mai i tua i le 1972, a o lea faatoa faatino i le 2011 ona o le a faamatuu atu i tua. O le ala lena o lau mataupu lea sa ou tau atu ai, e te le o malamalama i le talatuu lea mai tua ma le faaolaina o le Faalapotopotoga lenei. O lea la, ua feoi nei loomatutua ia, o se tala foi lea pei se tala faatusa ma faapea, e tu'i lava le koko, o le kamupani lea a le Vodafone, o la'u kamupani, o le kamupani Samoa, ona e kuata o sea lea e umia e o tatou tagata, ae auala tasi atu i i i le UTOS.

O le mea la sa ou tulai atu ai, pei o sina au tuualalo foi lele, soia ia, alu ese ia ma i leaga o upu a tatou e alu atu i totonu iinei, e ono lagalaga ai manatu o nisi e le o malamalama atoa i le talatuu ma le taumafaiga a le tatou Malo, ia toatele i latou o lo o i ai nai seleni e aumai e teufaafaigaluega ai i i ma feoloolo le latou seleni e maua ai aua e sili atu ona tele le tului e maua i i. Ma o le talatuu o le mataupu lenei, na amata mai lava i tua i le 1970 ma ona tupu ona faalagolago, e toomaga le Malo i mea nei o development loans. O nonogatupe mai o tatou tagata e faatino ai ana atinae ona ua matua le lava le seleni e faalagolago i ai, e le o tele foi ni a tatou nogatupe o faataga mai e Malo mai fafo. Ua ese la le tulaga lea ua i ai i le taimi nei lau Afioga i le Fofoga Fetalai, e pei e fai si loloto tele atu i tua le taimi, o le uiga lena o lau... e le o maua atoa e lau Afioga le talatuu o fuafuaga ia, ona e fai lava si maotua tele. O lea foi la na ou taua ananafi, e sao le agaga lea e te aumaia, e sao. Ae i ai foi lavelave la ia sa matauina mai tua e faasolo mai agai i luma e faaeteete i ai, o le agaga ina ne i aveva ma mataupu e fatufatu ai foi nisi tala sese e faasagatau ai i le galuega lelei o lo o faia e le UTOS. E pei la o le agaga lena, atonu o le taimi foi lele ua televave mai le mafaufau, e moni ai le tala i le toeaina foi lea sa... o se tala faatusa, tulou foi le faafogafoga mai. E i ai lana lapiti na alu e tuli o le a fasipe ona ua le usitai. O lea la e tuli i uta i le fanua, a o lea e tutu atu le toeaina tuaoi, tamoe mai lava le lapiti oso i le laulapa lafi ai, ae tilotilo atu o lea e tilotilo mai le toeaina lea. Ia fai atu loa le toeaina, "O le a le mea ua tupu?" Fai mai le lapiti, "O lea e tuli mai au e le toeaina e oo mai loa fasipe au, ia e alofa aua ne i taua au." Fai mai loa le toeaina, "Ua lelei." Sau loa le toeaina, "Na e vaai i lau lapiti?" Fai mai loa le toeaina, "Ou te le i vaai lava i ai." A o la e faasino le lima i lalo o le laulapa lea e lafi ai le lapiti. O le a la le upu a le lapiti, "Sole! O lena e sao lou lima ae sese lou gutu."

Lau Afioga i le Fofoga Fetalai, o lea e sao le mafaufau ae pei ua sese lou gutu. Ia e faamalie atu... see ese ia ma na mea.

**SUI FOFOGA FETALAI:** Malo saunoa i lau Afioga i le Taitai o le Maota. Ua manino lelei i le faalogo a le Maota ma le Nofoa, o oe foi o le Toeaina. Tulai mai, o oe foi o le Toeaina ua masani i mea faapea. Ae lelei ona tatou see ese, manumanu i lou taimi.

**Afioga Hon FAUMUINA TIATIA FAAOLATANE LIUGA:** Faafetai. O le taua ia o mea ia e talanoaina aua e sao lelei lava le Afioga i le Palemia o lea foi ua malamalama ai le toatele o tagata i le history. Ua ia faamatala faafia foi ia te au le mea lava lea e tasi. O le mea la lea e i ai, ia, afai foi ua i ai se faamatalaga ua laavale, ia faamagalo mai.

O le mataupu lea o le tatou... tasi lea pine faamau o le agai i luma o atinae a tatou, ma le tulaga ua tulaga ese ai Samoa e faatusatusa i isi atunuu laiti e pei o tatou, e le gata i totonu o le Pasefika, a o fafo atu o le Pasefika i le graduation o tatou mai le LDC i le Developing Country. O le mea e ofo ai lou loto ma e tatau ona fai ma pine faamau o le tatou saofaga mai i faiga o tonu o le atunuu, na oso le Heta i le 2004, oso le Tsunami i le 2009, ia ma nai matagi foi, toe sau toe oso Evani i le 2012, ae le i mafai ai ona tatou faaaogaina mala ia faalenatura na aafia ai tatou e aveese ai ma faaaoga o se tatou alofaga e tolotolo ai le alu i luma ma le siitia o Samoa mai atunuu matitiva i atunuu ua lelei le atinae. Ou te faafetai ai i le tatou Malo aemaise o lenei Palemene, aua a faaopoopo tau o mala faalenatura ia, ou te iloa e latalata i le \$2 piona le tau. O le tau lava ia o le Tsunami lea na lipoti a tatou sa tuuina mai i inei, e \$700+miliona le mea na faaleagaina. O Evani, e \$400 miliona. O Heta, e ova foi i le \$400 miliona. A faaopoopo ia vaega o mea na tatou galulue ai, toeitiiti lava \$2 piona le tau o le recovery a tatou. A o le a le mea na tupu? Na tatou o lava i luga i le mea e tatau ona tatou i ai. O le graduation lena o Samoa e fai ma pine faamau. Na pau lava le mea na ou fesili ai i le World Bank, pe aafia le tatou special treatment lea e i ai i nai a tatou talosaga i faaunegatupe e mama le tului. O le tali, e leai. O le graduation, e le afaina ai i, e tou te entitle lava e ave i tulaga ia pe afai e faatuatua ina faiga faavae a faigamalo e pulea mai le Faigamalo a Samoa.

Ou te avatu ai le faafetai tele i le tatou Palemene i lau Afioga i le Palemia ma le Kapeneta, tasi lena matatia o lea e agiagia i le tele... ta te gugutu ai foi i taimi o fono faava-o-Malo ma isi atunuu o le lalolagi, aua e le o se mea e faigofie. Ia, ma le faaaogaina o tatou malae taalo ma fale taalo i le host ina o le Commonwealth Youth Games, ia ma le isi foi taaloga lea na i ai nei. O le mea lava lea e i ai, o le le mafai lava e lea atunuu o le Pasefika ona host, host e tatou. Ua i ai mea uma i le tatou atunuu e fai ai. E pei o vaega na sa ou mafaufau ai e tuuina atu pea le tuualalo.

Na laga e le sui usufono mamalu ia Lauofo le tulaga lea i le faiga o le tatou... le mea foi lea o le a fai ai le dam i gauta i Alaoa. Na saunoa ai le...

**SUI FOFOGA FETALAI:** Se i malie le sui usufono mo Palauli le Falefa, se i tuu atu lava le avanoa i le Afioga i le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai e faamalulu atu, o lea e i ai nai taimi manu'a, e leai la se mea e popole

ai, o lea lava ua gauai atu au ma le Kapeneta nei tainane foi le Afioga i le Fofoga Fetalai i taimi manu'a, aua e le faapea o ni taimi manu'a ma sao, a o taimi e malolo ai le sui usufono a o le i laa i le isi itu. O le itu taua lea e galo i tagata, o lea ua aumai manino le maoae o le damage, le maoae o mea na faaleagaina e le afa lea o Ofa. E le i atoa le tausaga ae toe agi Valelia, e sili atu i lo Ofa. Ma ou te manatua le tele o fale na sii atoa lava e le matagi. E alu atu le matou asiasiga a o lea e agi lava le matagi ma Tofilau ma le Ofisa Sili o Pulega o le Matagaluega, le Afioga ia Leiataua Kuki. E matou te o atu, e pio atu le matou taavale, a o lea e agi lava le matagi, ae direct lava, faatonu lava au ma le Ofisa Sili o Pulega o le Matagaluega o Galuega e le matou Taitai, le Palemia, e alu le matou asiasiga. E alu atu lava ma feosofai solo i mea ia e pauu mai. E ma te oo atu i Siumu o le a matou liliu i le itu taumatau, lala e taoto mai le taualuaga o le fale i totonu o le moa o le auala, sii atoa lava le falealuga faapau i totonu o le auala, le mafai loa ona faaauau le matou asiasiga. E oo i le taimi na tu ai le taavale i luga o Alaoa ma vaai mai lalo, e lue faapenei le matou taavale, lue faapenei, a o lea e tu i le kia 4, i le malosi o le matagi, e 125 maila i le itula, ae agi Valelia, e 175 maila i le itula. O mea o taitaiga sa aoao ai matou e le matou Taitai, po o lou vaai atu lava i le oti, fai, alu le asiasiga. O le mea e taua i le toe faafoiga o tatou i le maoae, afa piliona i lea afa ma lea afa. A o le mea maoae, o le vave ona toe faaleleia. E fetau tonu lava le afa lea, le uluai afa, ae faatoa uma ona saina le feagaiga i le masina o Tesema. O Fepuari lea na agi ai le matagi, a o Tesema i luma mai. Ua uma ona ou saina le feagaiga ma le Faletupe o Asia, o se taimi muamua lea ua faamatuu mai ai se \$15 miliona tala e faaigoa o le nogatupe o polokalame lautele. O se taimi muamua lea e seasea ona tuu maia e se faletupe se vaegatupe tele faapea e lautele lona faaaogaina. Ae manatua la lau Afioga, na saina ia Tesema, Ianuari, ae aso 1 o Fepuari oso loa Ofa. Tusa na o le 30 aso. Ou te toe nofo pea lava ma ou mafaufau, e pei lava o se mea na musumusuina ai le Faigamalo, ua talanoa muamua i le mataupu lea ma le Faletupe o le Atinae ae o lea e le i agi le afa, ae 30 aso ina ua uma ona saina ua faamatuu mai ae agi loa le afa. O le mea lena na matauina ai le vave o le toe faaleleia o mea na faaleagaina ma faataoto mai ai loa i le afa lena le tele o taiala e tataua ona tagofia e le Malo mo le toe faaleleia o le atunuu. E oso mai la afa mulimuli lea e tau ai Heta, o lea ou te... Valelia lea e sosoo ma Heta. O Heta lea, o lea na agi mai ai le afa, ou te tau manatua lava, toe 200 maila taunuu mai i inei. E agi tonu mai lava i le ogatotonu o Savaii ma Upolu. Ae te i lava ua tu le afa ua le agi, ma taavilivili ai lava i le mea e tasi. E 12 itula na nofo ai i ina, ae ou vaai lea i le tala o le tau mai Niu Sila, fai mai le tala a le tagata lena o le saienitisi. "E faatoa tupu lea o se mea ua vaai i ai. E sau le afa e sau tonu lava, i le ogatotonugalemu o Savaii ma Upolu, ae toe 200 maila taunuu mai, ae tu loa le afa. Taavilivili lava i le mea e tasi mo le 12 itula, na toe gaioi loa, ae vaai atu, ua faatafatafa ane lava, ma agai loa i le Atu Kuki, lea na matua aafia ai le Atu Kuki." Lau Afioga i le Fofoga

Fetalai, o le upu a le saienitisi lea, “E faatoa vaai lea i se mea ese faapea.” O le vavega. Lau Afioga i le Fofoga Fetalai, ae na aafia la tatou i nai iu o matagi.

Ou te manatua o le taimi lena na ou alu atu ai, tasele uma i lalo ia laufai o nai ou fai na pe maua ea le 20. Ua tasele tasele i lalo, ae oo atu i le aso na sosoo ai ua le sau le matagi, ae na aafia i tatou i timuga, ma nai iu o matagi. Na i ai lava le damage, ae na laititi. Ona oo loa lea i le aso na sosoo ai, ua tumatilatila mai fai, ou alu atu loa toe tatipi i lalo, se i tulou lava le Maota, e mataga i le vaavaai mai o tagata. Ae o le mea na ou tapenaina, ina ia lalo ifo uma fai, ae tutu lava na o ou fai ia, pe maua ea le 20. E tupu lava i tafatafa o lou fale.

Lau Afioga i le Fofoga Fetalai, e oo foi i le Evani, e oo foi i nei mea e tutupu mai. O le a le mea lea e tupu? O lea e pau mai le timu, a o la ua 2 pe 3 afa lea ua aafia ai ia Fiti. E afua i se a ia mea? E afua i talosaga a Samoa. E masalo e na o tatou lava le atunuu, o lea e fai ai le vaiaso o talosaga ma anapogi i le amataga, a o le i amata le tatou folauga. E fai muamua le vaiaso o anapogi, o le vaiaso foi lena o talosaga. Ou te manatu e le iloa pe na o Samoa le atunuu lea e tulivae i luma o le Atua, ma o lea lava tatou te vaai faamanuiaga mai le Atua. O le mafuaaga ua ou laga ai le mataupu lena, ona o le taua tele i le toe asiasi i ai o le sui usufono. E leaga o le sui usufono, ua 14 tausaga o saofai i totonu o le Kapeneta. Ma e le o ni tamai Matagaluega ia sa tuu i ai, ona o le faatuatuga foi ia te ia. E ui lava ina tele foi isi mau faitioga ae sa faatino lava lana galuega. E malamalama ai la i mea ia, a o au lava ia, a ou tilotilo i mea nei e tutupu mai. Lau Afioga i le Fofoga Fetalai sa mafai lava e le Faigamalo a le HRPP, ona faafeagai ma mea ia, ma tau faaofiofi malie mai lo tatou sa. I luga o le faalagolago i le musumusuga lilo a le Agaga Paia. Lau Afioga i le Fofoga Fetalai, o le taua ia o le mataupu lea ua toe laga.

**SUI FOFOGA FETALAI:** Ua faamalo saunoa i lau Afioga i le Taitai o le Maota. E momoli foi le faamalo i le sui usufono e afua ai le faamaninoga ma le faamalalamamaga. Ua matua manino lelei ma faafofoga le atunuu, i le tulaga o taitaiga o Malo lelei, ma le vave ona respond. I tulaga o faafitauli na faafeagai ma le atunuu. O le mea lea e momoli ai le faamalo. E saolele le saunoaga a le Taitai o le Maota, leaga o le sui usufono o lo o saunoa. Sa saofai i le taitaiga o le Malo e ala i le aiga Kapeneta, ma e manino lelei i ai, o le taua lea o le toe faatepa. Ou te talitonu foi, o le mea sa i ai a o ou galue ai i le Matagaluega o Leoleo, i le tulaga o le vave ona toe recover, tulaga uma na saunoa i ai le Taitai o le Maota i lena taeao, e pei o le itu taua lea, o lea sa faafetaia ai e le atunuu le Faigamalo. I le tulaga o le vave ona toe tali atu i faafitauli. Aua tatou te le talanoa ma faalavelave faafuasei, mala faale-natura. Ae peitai o le tootutuli pea o le atunuu, e ala i tatalo ma anapogi, o lea e mafua ai, ona toe liliu le matagi ma faasao le atunuu kerisiano. O le

mea la lea, lau Afioga i le sui usufono mamalu tulai mai e faaauau lau saunoaga.

**Afioga Hon FAUMUINA TIATIA FAAOLATANE LIUGA:** E faafetai i lau Afioga i le Fofoga Fetalai, o le Viiga e foi lava i le Atua, aua o Ia e ona vavega ia ua aea ai Samoa. E pei lava foi ona ou tau faamaila atu le tulaga sa saunoa i ai lou uso a sui usufono le tofa ia Lauofo, i le tulaga lea i le faiga o le tatou faatanoa lea o le a fuafua e fai i se mea o Alaoa. O lau tuualalo lau Afioga i le Minisita lau Afioga Sili, o lea sa e saunoa e faasalalau i fafo ia le tulaga lea o tauofoga. I le tulaga lea e vaai atu i le...e i ai lou talitonuga, o lea e sao lelei lava le mea lea e te saunoa i ai. Ae mafai foi ona tatou silasila lau Afioga ma tatou, i le tulaga e mafai ai ona participate a tatou kamupani, i le tulaga faa-joint venture. E ala ona taua le mea lea o le joint venture, e mafai ai e kamupani mai fafo ona galulue soosoo tauau, ona o le tulaga...E i ai lava le requirements ou te le fiafia tele i ai, i le Faletupe o le Lalolagi, e faapena foi le Faletupe o Asia, o le cash flow requirement. O ai se isi o Samoa nei, e i ai se \$10 miliona po o se \$20 miliona i le bank? E tele a tatou mea la e i ai, a o aseta.

**SUI FOFOGA FETALAI:** Ia malie le sui usufono o lo o saunoa le Palauli le Falefa se i tapa le Minisita o Tupe.

**Susuga Hon Sili Epa Tuioti (Minisita o Tupe):** O le agaga tonu lava lena, o lea foi sa ou talanoa i ai. I le tulaga o le tomai lea e manaomia i ituaiga atinae tetele nei, tatou te faalagolago lava ia tatou paaga mai fafo. Ae le aveesea ai tulaga ia, o le tele foi o galuega ia ua fai i isi galuega tetele, o lo o o mai kamupani konekarate mai fafo, e fai paaga ma le toatele o a tatou pisinisi. O lea foi la ua uma ona ou talanoa atu, o le faiga foi lena o le a fai ai. O le naunautaiga lava ina ia mafai ona pass on ia tomai ma atamai lea e maua mai i tatou konekarate mai fafo. E faapena foi ona faufau ai foi ia tatou lava pisinisi. O isi tausaga atu i luma, ua maua le atamai ma le tomai, e mafai e latou ona fai a tatou galuega ia. Ae leai se agaga faapea o le a tuufau lava i kamupani mai fafo. E leai e tatau ona tatou faaoga ma galulue faatasi ma tatou kamupani, ma o le mea lena o le a fai i ai. Ma le faaaloalo lava.

**SUI FOFOGA FETALAI:** Ia malie le sui usufono, se i tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** E toe faaopoopo atu i le saunoaga a le Minisita o Tupe. O lea foi ua lavea mai i le saunoaga le vaega tonu lea, le Afioga a Faumuina sa Minisita foi o Tupe, e tau fai malamalama uma ia, i mea ia. E tele lava le lavelave o mea faapenei ona o le tulaga lenei



lau Afioga i le Fofoga Fetalai. O Faletupe ia tetele o le lalolagi o lo o fesoasoani mai, e tau fai sao uma i ai atunuu o le lalolagi. Ma o manatu foi ia tatou te avatua, o manatu foi ia e aumai e isi Malo o le lalolagi. Ae i ai le itu taua, i le vaai atu lea a tatou, o uiga ia e tataua ona mulimulitai i ai ia Faalapotopotoga nei tetele a le lalolagi. E tataua foi ona faalogo mai i le mea lea e tuualalo atu, o tatou e sili atu le iloa. A o le faalavelave, e faapena foi ia isi atunuu e silia ma le 200, o lea foi e avatua ituaiga manatu tatou te avatua. A o le faalavelave la, o tatou lea e talosaga le aumatitiva, a o le aumauoloa o la e sau ai tupe, o la foi e saofafai ai i totonu. O la foi e vaai mai latou i le itu a tatou, o la foi e ese foi le latou faitau. O lea la e fetotoai ai i i pulega o Faletupe aua o le tagata e pule, e le gata o le ADB o le ADB i lalo o le latou faiga faavae, o le Sapani e avea ma Peresetene, o le latou lava lena faavae. O le mafuaaga leaga o Sapani na i ai i le amataga ma e tele atu le tupe a Iapani lea e i i i le faletupe lea, ae saofafai ai foi ma sui o Malo tetele. E pei o Amerika Peretania ma isi, lea e tele le tupe lea e sau ai. A o i la i Faalapotopotoga tetele ia o le IMF, faaputugatupe a le lalolagi, e faapea foi ma le Faletupe a le World Bank, IDA, IFC, o le IFC o le lala lea e faapitoa i mea o galuega tetele e tai piliona ma piliona tala le tau. Ae a oo loa la...ma o le faitioga na e masani ona fai e atunuu nei ma Minisita, i le IFC, International Finance Corporation e matua leai ma se tou aoga i i i le Pasefika.

O le ala lena na faatu ai loa se latou tamai lala lava, e faaigoa o le South Pacific Facility, sa faatu i i i Sini Ausetalia. Sa faitioina foi le latou filifiliga, e aumai ai ni fesoasoani i le tatou atunuu. Ona o le matou faitioina soo i le taimi lea o le fono a Minisita o Tupe, lea na maua mai ai nai fesoasoani. Na faatu ai le faletalimalo lea i tua i Siumu, o le Afioga ia Tuatagaloa. Na faatu le fesoasoani muamua lava lena, na aumai fau ai loa le faletalimalo lena i le intervention a le Malo. Na toe fau ai le fale tele lea gaosi oloa a le tama lea na mu o Wilson, i Vaiala. E 3 fesoasoani na aumai, ae faaletonu loa talu ai faaletonu ia ua tutupu atu i totonu o Samoa. Ae o le uiga o le faamatalaga lau Afioga, e i ai lava le mutaaga o mea uma. Ona o le toatele o atunuu, aemaise lava le taimi lena o le Koviti-19, o lea ua tau fai faapenei uma atu i faalapotopotoga ia.

O lona uiga la, o le galuega a le komiti lea e i luga, o le tau faiga o se tonu e fetalai. E tau faamalie ai ia le vaega lea e sau ai tupe ma tau faamalie ai tatou. O le ala la lena, e tele lava le tofa fetalai lea e i ai i totonu. Ua le taofia ae faaafaafa, meet half way, ona mafai ai lea ona faaauau ai pea na i fesoasoani ia e tuu mai. Ae o le agaga la lena o lea e saunoa mai ai le Minisita o Tupe. A o le uiga lava lea o tatou, a aumai loa le vaega lea, matua tui lava ia mamapala ona o foi lea o latou i o, taumafai e fai sina mea foi lele, e fetau ai i i le tuaoi i le ogatotonu. Ae le faapea o le a matua fai lava le mea lea e fai atu ai tatou. Ona o le tulaga lena, e fa'i foi o le vaai mai, ae fai ma le faaeteete e vaai tama ia e sau ai tupe. Ma e alu alu lava sau le talaiga, o outou

na o Minisita o Tupe, o e tau i outou Malo, e toe faaopoopo mai se tou saofaga. O lea la e fai ma aapa mai, a outou vaai i le tala o le tupe lena e alu atu ai saofaga i Faalapotopotoga faava-o-Malo, ona tou iloa ai lea o le mafuaaga. O lena lava e alu atu i le tala o le tupe, e leai lava se mea o lilo. O lea e malamalama uma mea e avatu e le Faigamalo lenei. Lau Afioga i le Fofoga Fetalai, o le toe faaopoopo atu lea, ina ia atili malamalama ai ia le mea lea e saunoa i ai le sui usufono, sa Minisita mo tausaga e tele. A o lea foi e saunoa mai le Minisita i le taimi nei, o ia lea o lo o gafa ma faatalanoaga ma Faalapotopotoga tetele ia a le lalolagi.

**SUI FOFOGA FETALAI:** Ia malo saunoa. Malie le sui usufono mo Palauli le Falefa, se i tuu atu lava le avanoa i le Minisita o Galuega tetele a le Malo.

**Susuga Hon Papaliitele Niko Lee Hang (Minisita mo Galuega, Felauaiga ma Atinae Eseeese):** Faafetai mo le avanoa, faafetai foi i le Palemia, masalo o lea ua manino lava le faamatalaga o tulaga ia. Ae na o se mea e faaopoopo, ona o lea e pei e matau atu i le saunoaga a le sui usufono. E faapea o lo o i ai se tulaga e fesoasoani ai tatou i tatou konekarate ia local contractors. Aepeitai ane, e i ai lava conditions a le World bank, ADB po o le IMF foi e tuuina mai ia tatou, tatou te faatalanoa ai le fesoasoani lea, ma vaavaai i konekarate ia e agavaa. E pei lava o le mea lea e malosi ai le sau o fesoasoani ia, e aumai ma latou conditions. A le satisfy ina ia conditions ia, e le maua e tatou local contractors ia galuega. Mo se faataitaiga lau Afioga, e tele galuega tetele ia na maea atu nei, e pei o le galuega lea o le Maliolio, sa aumai lava ma faapena ona maua e le konekarate mai fafo. Aepeitai ane la na toe talia mai lava talosaga a lo tatou Malo e ala atu i le Ofisa o le Tupe, i tuutuuga foi ia e tau faafaigofie ai ona qualify a tatou local contractors. O lea na iu na maua e le konekarate lea a Ah Liki le faiga o le auala sima lea i Maliolio. E i ai foi a tatou galuega ia e tapena i le taimi lenei, e pei o le galuega lea e fund e le ADB, le auala lea o le cross island road. O lea foi e tapena ma o lea e ave lava le fautuaga ina ia mafai ona qualify a tatou local contractors. O lea la ua aumai le avanoa, e fai ni join ventures, o le faataitaiga lau Afioga i le Fofoga Fetalai. Auala foi lea na amata atu i i, alu agai i le malae vaalele. E tasi lava le konekarate na qualify e na o le konekarate a le Ott contractors. Ae peitai ane la, o le naunautaiga a le Malo, ia ave le avanoa i isi a tatou local contractors ia maua se avanoa e maua ai ni a latou galuega. O lea na fai ai loa le tulaga lea, talia mai ai loa e le World bank o le a fai ni joint ventures. O lea la na maua e le isi joint venture lea le isi vaega o le galuega lea. E pei o le tulaga lea, o le naunautaiga o le Malo ia faamanuiagaina a tatou local contractors, ae peitai ane la e i ai conditions e fai si maualuluga. O lea la e taumafai le Malo ina ia taumafai e toe talanoa ma talanoa ina ia maua a tatou konekarate lea i totonu, o local contractors

aua e taofi ai i ina le manuia. Aua a fai e tatou, e taofi uma lava tupe ona maua e konekarate mai fafo e taofi i inei e atinae ai o tatou tagata, ma atinae ai foi lo tatou tamaoaiga.

O le damp lea e saunoa i ai le sui mamalu, o lea foi ua faagasolo ia faatalanoaina. O lea ua maua le fund e \$100 miliona mai le ADB ma isi foi a tatou development partners e fesoasoani i le poloketi lea. A o lea la e fai talanoaga i le taimi lenei i se tulaga foi e... amata loa tapenaga, fai foi lea o le tauofoga e faasalalau po o ai se konekarate. A o le agaga lava lea o le Malo lau Afioga, ina ia fesoasoani ia tatou lava kamupani. O le tulaga lea e fesoasoani atu ai i le mataupu lea ma lou faaaloalo lava.

**Susuga Hon Tuilaepa Auelua Fatialofa Lupesoliai Lolofietele Neiotei Aiono Galumalemana Dr. Sailele Malielegaoui:** Lau Afioga, e faamalulu atu lava, ona e lelei lava ona soosoo atu ia vaega ia, leaga a tuu mulimuli e le fesootai ma le mataupu tonu o lo o laga. E taua tele le mataupu lea na tulai mai ai ia le Minisita o Galuega, i le taumafaiga ina ia faatoatele tama fanau a Samoa e maua le poto masani. Ma o le ala tonu lava lena, e fai ma tau tuai ai le faatinoga o tatou galuega, ona e fa'i foi o le finau mai o latou. Ua matua malamalama lelei i le kamupani lea a le Ott Construction, o le kamupani ua atoa uma i ai le tomai. E maualuga e compete ma so o se kamupani mai fafo, e mafai ona fai uma lava e le Ott Construction ia auala uma lava, i le top quality o lo o manaomia. Ae o le agaga la lea i le Minisita ma le Matagaluega, o lo o latou faatinoina le vaega lea i policy tauave a le Malo. Ia uunaia ia tatou tama fanau o lo o i ai le tomai lea, e tau ave ae ai i luga lo latou tomai. O le ala lea o lea na fai fai lava le finau, talia loa le toa-tolu lea o pisinisi fai auala. O lea la a outou o atu ai, ua vave ona uma le vaega a Ott, a o lea lava e tau paluku atu le vaega a le toa-tolu lea. Ua uma foi la ona ou talanoa i le toa-tolu, sole tau mataitu, ma tau faatelevave, faaleleia le quality. Ou te le iloa pe ua faafia ona mix a latou tar ma teena, teena atu e le LTA e le o talafeagai le malosi, i le fua o le tar e tataua ona i ai. Leaga o mea foi ia o konekarate, e i ai foi le agaga foi lele, a maua lava lou auala i le vave i le pioga e pio ai loa i ina. E le o malamalama la latou ia, e iu ina TKO ai i, i le fai mea palafu, o le ala lena o lea ua outou vaai atu, ua leva ona uma ia Ott, a o lea e tau paluku atu le toa-tolu, o le tau siiga i luga o le latou malamalama ina ia talia e le World bank le faaauau pea o latou i atinae tetele ia mai fafo. E manatua la, o lea ua pasi le faaauau atu e tau i o i le malae vaalele, a o lea foi e i ai isi a tatou auala, o lea ua taoto, le alu atu lea e faalelei ai le auala lea e alu atu i Tiavi e tau lava i Siumu. O lea la e faapenei uma mai atinae nei, a o le fautuaga lea ia i latou ia e fai konekarate. E tele le manuia lea i atinae tetele nei, a o le taofiga o konekarate ia mai fafo, e faalagolago i lo outou fai mea tonu ma le faamaoni. E aoga foi la le lagalaga o mataupu ia e alu atu i totonu o le Maota fono e faalogologo lelei mai i ai. Ou te le iloa pe ua faafia ona samania uma i latou e le Kapeneta ma avatu talanoa sao i ai le

Kapeneta ia faamaoni, ia faamaoni. Aemaise lava i latou nei e fai ma teuteu auala. Ia matua tipi lelei auala ma toe faafou le auala na i lo le alu atu asuasua i ai na o le oneone. E tele lava le fai mea piopio lea e i ai, ae o le taumafai lava o le Malo e encourage ia kamupani nei ia tulai mai. Aua o le lelei o latou kamupani, o le lelei foi lena o le tauvaga e fai, ma o le tele foi lena o tagata fai mea lelei o le a tulai mai i lo tatou atunuu i le lumanai. E ui lava la ina i ai le fai mea leaga ae onosai lava, ma tau uunai a tatou tama fanau. O lea e matau o le finagalo lea o le Maota lenei, ia uunai a tatou fanau ina ia faaleleia le latou tautua. Ae maua foi avanoa i fafo, e i ai le tausaga na uma ai le taua tele lea i le va o Iraq ma Saudi Arabia. Ona liliu lea loa lea o Amerika ua toe faalelei ia Iraq, toe o latou toe faalelei mea na latou faaleagaina, ave i ai konekarate faapena foi ma Saudi Arabia. A o le taimi foi lea na faatu ai le faamasinoga a le lalolagi mo latou solitulafono, World Crimes Court. Ona faasalalau loa lea o avanoa, ona tuu loa lea i ai o le igoa o Tuiloma ae fai le campaign a le Malo. Na matua fai lava le campaign a le Malo, sao loa Tuiloma e avea ma faamasino o le faamasinoga lea o mea tau solitulafono e i la i Roma. E le i lagolagoina la e le Malo o Amerika ia le World Court lea on crimes, i lena taimi. Ae pei lava o mea tetele, fai loa le campaign a Amerika e tusi ai i Malo, aua tou te lagolagoina le court lea. A outou lagolagoina, e le avatua ni galuega i tou kamupani e galulue i le reconstruction o Iraq, o lona uiga o le standard letter o le tusi e tasi lava i atunuu uma lava o le lalolagi, o lea e saofafai i totonu o le Malo Aufaatasi. Ona aumai lea ma le tusi ia te au, ia ave loa i ai lau tali. E faamalie atu, e leai ni matou kamupani tou te tuuina mai ai se avanoa e o atu i le reconstruction. Ae malie, o le a faapefea ona matou le taliaina le world court on crimes, o la ua saofai ai le tamalii Samoa i totonu o se tasi o Faamasinoga. Lau Afioga i le Fofoga Fetalai, e faapena mea a le lalolagi, e fai ma taumafai e aumai le fesoasoani e fesoasoani ai i atunuu, ia ae i ai foi ma nai manoa e pipii mai ai, e pei ona laga e le sui usufono. A o le tiute lena o tatou o le taumafai e talatalanoa i ai, e le faapea o fai faamalosi mataupu lenei. O tagata foi ia e saofafai i luga o pulega o tagata foi e malamalama, aemaise o lea e i totonu o Samoa ia latou sui. E amata atu lava i i nei i Samoa ona faataavale le tatou polo. Aemaise o latou ia e i totonu o Samoa o tama fanau a Samoa, sa ave i fafo e sikolasipi ma ave i fafo galulue ai i faalapotopotoga nei a le lalolagi tau tupe. O lea la ua toe foi mai galulue i totonu o Samoa, ua malamalama lelei i aiaiga foi o faaiuga fai i faalapotopotoga ia faava-o-Malo. O lea la e iinei i Samoa o latou sui, o i e amata faataavale atu ai na i a tatou polokiki ma agai atu ai i o, e malamalama foi nai a tatou tama fanau ia e saofafai i totonu o le Ofisa o le Faletupe o Asia i totonu o Samoa, ia faapea foi le Faletupe o le lalolagi i totonu o Samoa, IMF ma Faalapotopotoga uma na, o tama fanau uma a Samoa. E malamalama ia tatou tu ma tatou agaifanua. Lau Afioga i le Fofoga Fetalai, o le toe faapoopo atu lena.

**SUI FOFOGA FETALAI:** E matau atu o lea e tulai mai le sui mo Aleipata Itupa i Lalo.

**Afioga Tafua Maluelue Tafua (Aleipata Itupa i Lalo):** O se mea e toe faamalamalama atili, faafetai tele i le saunoaga a le Taitai o le Malo le Afioga i le Palemia, faafetai foi i le saunoaga a Faumuina ua faamanino atili ai le vaega lea. O si tamai mea lea na ou tulai atu ai, ona talu ai o le tele ia o social implications, lea tatou te talanoa ai nei. Ae ua ou tulai atu ai ma le faaaloalo mo le faamalamalama atili o le vaega lea. E faafetai lava o lea ua faamalamalama, aemaise le tulaga lea o le toe faafouina o tatou auala. Aemaise le auala lea i le malaevaalele. Ua ou tulai atu lava ma le faaaloalo, e faa-lua faa-tolu ona o matou asiasi i le faiga o le auala lea i le malae vaalele. O lea foi sa lavea i lau lauga, ma ou te matua faa-luaina faa-toluina le finagalo o le palemia lea na faaalua nei. E toatele inisinia toatele le au atamamai sa aoga i fafo, omai manaia ma lelei le fautuaga ua aumai i le Malo. Ae tasi lava lena o lou faanoanoaga e le tutusa uma, e pei ona saunoa le Palemia. E le tutusa uma konekarate fai auala i le faiga o tatou auala. Ma o lea ou te tulai atu ai ma le faaaloalo. E faamata e i ai se tulaga foi lele, o lea e maua atu o Ott Construction lea latou te, e i ai uma mea faigaluega e i ai foi le tomai faapitoa i so o se mea eseese, e le gata i inisinia, inisinia faiauala, inisinia i mea tau vai ma mea uma faapena. Pe o le a le mea e le exclusive ai ia Ott le faiga o kamupani, ina ia faasafua lava le tamaoaiga i totonu o le tatou atunuu.

O le mea la lea ou te tulai atu ai ma lou agaga faaaloalo, na o se tuualalo atu i le Malo ma le faafofogaaga foi a konekarate, pe tuu i se tasi se kamupani tele lava pei o Ott o lea ua i ai uma le tomai ma mea uma i totonu, ae tuu ai ma ni aiaiga a le Malo, sub-contract i tatou lava kamupani tetele foi fai auala lea e i ai nei, ina ia tasi lava le kamupani latou te oversee ina uma mea, ae sub-contract i isi konekarate laiti ia e i ai po o konekarate lapopoa foi mo le faiga o tatou auala lava. Aua e ala ona ou tulai atu ma lou agaga faaaloalo lau Afioga i le Fofoga Fetalai, o le matou auala galue i Saleaamua na fai masalo po ua 3 nei masina, a outou silasila i ai i le taimi lenei, ua matua tele lava le faaletonu. E moni lava la sa timuga ma faaletonu le tau, ae sa le tatau ona oo i le tulaga la e ua i ai nei. O le mea lena o lea ou te tulai atu ai, e manaia foi o le mea lea e fai ai aiaiga, terms and conditions, aiaiga ma maliega i lalo o feagaiga i totonu lava o le tatou atunuu. Aua o le agaga o le Malo lea e i ai o lea ou te matau atu, faasafua le tamaoaiga. E le faapea o le a ave uma lava tupe i le Ott Company e maumea ai lava latou ma maua ai, ae a aumai ai ma se condition a le Malo e ave i ai, e faasafua i isi kamupani ia e i ai lea ua i ai foi le tomai ma le poto, ae le i maua lelei le tomai ma le poto lea e i le kamupani lea a Ott. E pei o le mea lena o lea ou te tulai atu ai au ma lou agaga faaaloalo. Na o se tuualalo.

Ia ma le isi mea e faaopoopo atu ai o maua si ou avanoa, o le monitoring lava a lelei le tatou monitoring o tatou auala ma galuega e fai pe a uma ona fai, aua e molimauina e oo lava i le taimi nei, o le sooga o auala lea e i luma atu o le mea foi lea na ou lauga ai talu ai ua fai si levaleva atu, o la e le i sooga lelei. Ae ui o lea, i te i ua salaese lau tala, a o le agaga o le faafetai, manaia le mataupu lea na saunoa i ai le Taitai o le atunuu. Faafetai foi ia Faumuina i le lagalaga i mea lelei. Ia manuia le aso.

**SUI FOFOGA FETALAI:** Ia se i tuu atu muamua le avanoa i le Taitai o le Maota, Taitai o le Malo. Saunoa lau Afioga.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** E taua le mataupu, e le o se mataupu fou foi. A o upu lava ia e ave e silasila i ai le Matagaluega po o le Faalapotopotoga, vaavaai ane le vaega lea e faaletonu latou fai auala, tipi motu aua le toe avea i ai ni avanoa. Ae se i fai atu lau tala, o lea e nofo mai Faumui. O le tele lava o nei mea, e i ai foi le common sense e faaoga, o le faaogaina o le faautautaga tatau.

Ua ou le iloa, o le tele ia o vaiaso na ou talanoa ai ia Faumuina, o le Minisita o Galuega, kilia ese uma lava tatou patu ia e fai, e leaga ae fai le patu muamua faataitaiga i Malifa, se i tuu atu la i le auala lea e alu i Falealili, ia gafa faapea le tele o le patu ia pei o patu ia ou te vaai ai i fafo, lea foi ou te tilotilo atu ai i tuuga taavale foi nei e tuli e leoleo le au kuluku, le au gaoui, ae tuli i taavale. Ae vaai atu i patu ia a Amerika, e fai sina laugatasi, na o le pau lava sina tamai mea foi lele e maualuga, ae gafa i le 2 gafa le lautele. Ia pe atoa ea le fia vaiaso ae fai mai Faumui, o la e ua uma ona fai, o le a ta o e vaai. Ou alu atu vaai, masalo pe na o le futu ma le afa le tele. Ou fai atu, “Faumui, fai i le alii lea, na ou fai atu ia oulua e gafa le lautele.” Alu alu alu, fai mai Faumui, o la ua lelei. Ou fai atu, vaai, e na o le tasi le iata. Faumui, na ou fai atu ia oulua e faapea le tele o le mea e igoa o le gafa. O le faa-tolu ona fai faatoa maua le gafa. A o la e faauluulu le Inisinia, o lea ua fai nei lana konekarate tele lava, ae ou te iloa o la e alu lava ma le lē atoatoa. Ia, ae matou o atu loa ma te asiasi, fai mai loa, o la e ua lelei. Ae matou o atu loa ae timu, ou fai atu, oi a faapefea ona alu le vai lale ua toa mai o? Ia, ona toe tui foi lea o le paipa e alu i tai. Ia fai mai loa, o lea ua lelei, ou fai atu, ia ta o loa la e fai le patu i o i talaatu o le falemai, le auala lea e alu i le falemai. Fai mai, la e ua uma. Lona uiga e le i vaai i ai Faumui, a ua logo e le Pule Sili o Galuega, o le inisinia e leai se common sense, o la ua uma. Ou fai atu ia Faumui, a uma loa le Kapeneta ou te fia alu ou te fia vaai i ai. Aisea? Leaga o le matou profession lena, o le profession lena po o le taiala silisili lea a le profession a a’u le Suetusi, aua aua aua e te talitonu i se tala a se isi ae alu e vaai. Ia ma o loa vaai, ou alu atu, e na o le afa o le... masalo pe na o le iata ma le afa. Ou fai atu, “Faumui, e gafa atoa le mea na ou fai atu ai.”

Ae fai atu loa i le Pule, “O le a le mea ua faapea ai?” Fai mai, “Leaga ua leai ni maamaa.” Ou fai atu, “Alu i o i le kamupani la e i o a le ACP e aumai ai ni maamaa.” E oo lava i le tau faatonuga i le mea e aumai ai maamaa, e tau faatonu.

O lau fautuaga lena i le tele o le mau fai faailoga lea e i ai nei, vaavaai le tou common sense, faaoga le common sense. Ia se i vaai o au lea e taitai o le common sense ae o lea pei ua ou inisinia. E sao au Faumui?

**Afioga Hon FAUMUINA TIATIA FAAOLATANE LIUGA:** E sao lelei.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Ia ua uma.

**SUI FOFOGA FETALAI:** Ia se i tuu atu muamua lava le avanoa. Malie le Minisita o Galuega Tetele a le Malo o lea e fia tulai mai le Minisita mo Faatoaga ma Faigafaiva. Saunoa.

**Tofa Hon Lopao Natanielu Mua (Minisita mo Faatoaga ma Faigafaiva):** Faafetai i lau Afioga. O au e ese lau mataupu, ou te le tali atu, ae o lou malamalama ia i le mea lea e saunoa i ai le... a o lea e i ai le Minisita o Galuega e tali atu ai. Mo lou silafia o local joint ventures muamua lava na fai i totonu o le atunuu lena, o au na faia, o au na amataina. Ae ui i lea, ou te manatu o lea e i ai le...

Lau Afioga i le Fofoga Fetalai e salaese lau mataupu, ae na ona ou fia fautua atu i lau Afioga po o le a le mea e tatau ona fai, pei uma lava e tatau ona aoese tatou telefoni, ave e tuu i se mea ina ia... a tatou omai nei i le tatou Fono a le atunuu tatou te auai i le Fono ma tatou faalogologo i mataupu o le Fono, aua o le tatou tiute lena. Aua o le mea tonu lava lea ou te vaai atu, ia o lea na o le telefoni lava le mea lea e fai e isi tagata o le la itu po o... e pei e foliga mai e uma foi ona o ese atu i le Fono ananafi ma talaatu ananafi e le faanoi pe faanoi pepelo mai... Ae pei o le agaga lena lau Afioga, e le faatonuina lau Afioga i le Fofoga Fetalai, a o nei mea e tatau ona faasao, o lea foi e olo lava le fua, o le tele ia o mea lea e o fai i tua e olo lava le fua. Ia o le mea foi o le a olo olo ua tau mafoefoe.

Ae malie lau Afioga se i fai se faatautu i ai i le tulaga lea. Ma le faaloalo lava.

**SUI FOFOGA FETALAI:** Malie lau Afioga i le Minisita mo Galuega Tetele a le Malo se i fai atu se tala a le Nofoa i le mea lea e saunoa i ai le sui usufono mamalu, le Afioga i le Minisita mo Faatoaga ma Faigafaiva. E le mama foi i le Nofoa le finagalo o lau Afioga i le Minisita, ua uma ona taoto aulape, ma ua uma foi ona faataoto tulaga o tatou Tulafono Tumau i le

tausiga o le mamalu ma le filemu ma le toamalie. O lea la a outou silasila atu o le galuega lea o lea e fai i le faitotoa i lumamea ina ia mautinoa tulaga ia e te saunoa i ai e le mafai ona faaaogaina.

O le mea la lea afai o toe faafofoga mai o ai lava o faaaogaina telefoni i totonu o le Maota, e i ai tatou Tulafono Tumau i le tausiga o mea ia. O le mea la lea, o lea foi ua tuu atu i le Satini o le Maota e faapea foi le Sui Failautusi o le Fono Aoa ma le aufaigaluega, o le latou tiute lea o lo o tauave pea, e le o mafai ona nofonofo le Nofoa i le tausiga o mea ia e saunoa i ai le Afioga i le Minisita ina ia aua ne i faaaogaina i taimi o tatou Fonotaga. O le ala foi lea o le fai o tatou break, o lea lava e fai o tatou break, ia pe afai e fia faaaogaina i se tulaga faavavevave, aua o tatou e i ai lava tuatuagia o aiga ma mea faapena i itumalo. Ia e le mafai foi la ona taofia ai le vala lea, a o lo o mafai lava ona faataga e tuua le nofoa ae faaoga i fafo ma tuu le telefoni i le faitotoa i luma ae agai mai mo le faaauauina o le valaauina o tofi sui usufono filifilia o le atunuu.

O le mea la lea faafetai i le Minisita i le toe tuuina mai o le mataupu lea, ia o lea o le a silasila totoa i ai le Failautusi ma le Satini o le Maota, i le tulaga o le tausisia o tatou Tulafono Tumau.

E tuu atu le avanoa i le...

**Tofa Olo Fiti Afoa Vaai (Salega Sasae):** Lau Afioga i le Fofoga Fetalai, e faamalulu atu i lau Afioga pe maua so matou avanoa...

**SUI FOFOGA FETALAI:** Se i tuu atu le avanoa lea. Malie lau Afioga i le Minisita, se i tuu atu le avanoa i...

Malie lau Afioga i le Minisita se i tuu atu le avanoa i le... o lea e te fia saunoa i le mea lea sa tautala i ai le Nofoa?

**Tofa Olo Fiti Afoa Vaai:** Ia. O le manaia ia o le mataupu e pei ona laga. Ae ua faalogologo atu, ua aafia fua le maaveave le fua i le saunoaga faapea mai o faanoi pepelo ma mea faapena. Ia, aua le popole, se o le tatou taaloga e faapena. Ua faapea mai foi e tou te le o popole, a o lea e popole.

Ae o lea na ou tulai atu lau Afioga i le Fofoga Fetalai, i mea ia o... le mataupu lea i le inisiniaina o tulaga faapea... O lea e molimau atu le matou Taitaifono le Afioga i le...

**SUI FOFOGA FETALAI:** Malie le sui usufono, na ou faatagaina... se i alaala mai lava i lalo se i fai atu le... faamolemole. Sa ou faatagaina lau faauilavea ona o le tulaga o le mataupu sa laga, lea la ua agai i le isi mataupu, ou te le faatagaina. E mafua i se a? O Tulafono Tumau e te le i saunoa i mea ia i lau lauga autu. O le isi vala, e le mafai ona faauilavea le isi sui usufono i le faauilavea a le isi sui usufono. Ua e matua i le Maota, e le tau fai atua se faamatalaga a le Nofoa. Malie le sui usufono, ua ou faamutaina lou agai i le



isi mataupu, o lea ua maea le mataupu na faatagaina ai le sui usufono mamalu.

**Tofa Olo Fiti Afoa Vaai:** E faamalulu atu i lau Afioga, a o lea foi la ua faasa lau faauilavea ae faataga isi faauilavea o le ala tonu lena lea ma te mumusu ai ma te nonofo atu i i, o le le maua o ni matou taimi e avatu ai o matou lagona i mataupu. O lea e agai lau faauilavea i mataupu tonu lava ia i mea tau inisinia, leaga ou te i ai i totonu o le Komiti o Galuega Tetele a le tatou Palemene. O lea ou te malamalama i mea ia e tau fai atu ai sau tala. Ae a faapea o lou finagalo lea, o le a...

**SUI FOFOGA FETALAI:** Ia lelei. Se i ou fai atu a la i le mea lea, leaga o lea lava e te finau mai i le Nofoa, a o lea ua uma ona faamanino atu le tulaga o le tatou nonofo ai i faauilavea. Faitau le tatou Tulafono Tumau. Afai sa e taea i lau lauga autu le taimi na e lauga ai le mea lea e te fia faauilavea ai i le faamalamalamaga a le Malo, o le a le mea e tuu ai? E faataga. A o le faauilavea la i le mea e le i... vagana le faauilavea i le lauga autu. Leaga o lea e tusi lou lima ma agai faapea. O le mea la lea Olo, se leai, o lea lava e... e lelei foi mata o le Fofoga Fetalai. Malie lou finagalo, o lea lava e tausisi le mamalu ma le filemu ma tulaga o le taoto ai o tatou Tulafono Tumau. Agai la lau faauilavea i le lauga autu, e le o le faauilavea i le faamalamalamaga a le Malo, leaga o lea e agai le faamalamalamaga a le Malo i le tulaga o le lauga autu a le sui usufono mo Palauli le Falefa. Ia o lau lea taumafai e faamanino atu le mea lea...

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, o se mea e fia avatu ai sina au tuualalo i lau Afioga i le Nofoa. A faafofoga lau Afioga i le saunoaga a le sui usufono faatoa mavae atu nei, na ia saunoa mai o le Fono lenei a le Palemene o mea o taaloga. E le o ni taaloga mea ia lau Afioga, o le Fonousu o le Fono mamalu, o le Fonotoa a le Palemene e faaali ai finagalo o sui usufono aua le manuia au i luma.

A o le saunoaga a le sui usufono lea na faatoa faamaui atu nei na agai mai i le Nofoa, o mea o taaloga mea ia e fai. E le o ni taaloga. E vaai mama le sui usufono pei e faaulaula ana faamatalaga i le Fonotaga a le Palemene lea e fai nei. E le o ni taaloga le Fono lea, o le Fono mamalu a Samoa lea e usu.

**Tofa Olo Fiti Afoa Vaai:** Lau Afioga i le Fofoga Fetalai, e faamalulu atu, e le o le sao lena. O lea e popole mai le Afioga i le Minisita i polokalame lea e faaalu nei a le FAST. O lona uiga o la e popole i lana palota. O mea ia o palota, se o mea o taaloga, e le tagi ai se isi.

**SUI FOFOGA FETALAI:** Ia, se i tulai mai lau Afioga i le Minisita mo Faatoaga ma Faigafaiva ona o lea ua salaese le mataupu mai le lauga autu.

**Tofa Hon Lopaoo Natanielu Mua:** Faafetai. E leai, e sao lava lau ia fesoasoani atu i le mataupu, ae ou te le i fai atu o se palaai i le mea. Leaga o le mea lea e popole ai foi lele le sui, ou te le o popole atu i le palota, e leai se mea e te popole ai fua i le palota, aua tou te fiu lava i lou itumalo, e malo lava lou itumalo. Ae le o le tulaga lena. A o le tulaga o le faaaloalo ma le aloaia o le Fonousu a le atunuu, amanaia o lau Afioga ma le Nofoa o le atunuu.

O le mea lena o lea tau faamanatu atu i ai, o le amanaia, ae le o le omai. Ia se i vaai la i ai i le faaupuga ia e fai mai faapea, e le gata o le o fai faapena i luga o le ea ma mea uma la faaupuga e le kea ia oe... ae faanoi mai faapea ae o atu o tapue mai ata o la e talie mai Savaii. Ia o la e talie mai i le Nofoa? Ia se i vaai i ai? Ia se i vaai la i ai i mea e te faia? Ma le faaaloalo.

**SUI FOFOGA FETALAI:** Ia, malie lau Afioga i le Minisita, o lea ua ou fai atua le faaiuga. E lelei ona tatou see ese i le mataupu lea, o lea ua uma ona fai atu le faaiuga a le Nofoa, ua uma ona fai le faaiuga a le Fofoga Fetalai i le tulaga o telefoni. Ua uma, e le faatagaina. Vagana le tulaga ole fesootaiga aemaise le tatou tauaofiaga leni i tulaga o le Tala o le Tupe, fesootai ai ma CEO ma se tulaga i se mea e ao ona vave moomia. A o le tulaga i telefoni, o lea ua ou fai atu, ua uma ona fai le faaiuga a le Afioga i le Fofoga Fetalai, e le faatagaina, ma aua foi ne i toe faatagaina i taimi o taualumaga o tatou Fonotaga.

O le mea la lea lau Afioga i le alii Satini, se i silasila ane ma ave le fautuaga. O le mea lea, o lea ua ou faamutaina le mataupu lea, ae lelei ona tatou faagasolo i le tatou galuega e pei ona i ai galuega o le aso.

Tulai mai lau Afioga i le Minisita o Galuega Tetele a le Malo.

**Susuga Hon Papaliitele Niko Lee Hang:** Ia, e momoli atu le agaga faafetai i lau Afioga i le Fofoga Fetalai. Faafetai o lea ua maua lou avanoa. Sa manatu lava ona sa ou tulai atu e faaauau le saunoaga a le Afioga i le sui usufono o lo o saunoa i le mataupu, aemaise foi la le faauilavea a le Afioga i le Tuiatua. Peitai ane, o lea o le a pei o le mamao o sisifo ma sasae le mea lea o le a tatou oo i ai, a o lea e le i uma le mataupu lea se i tali atu ai i le lauga a le sui usufono. O lea la ua faaali mai le faanoanoaga o le Afioga i le Tuiatua i lona auala i Saleaamua, ma le faaupuga la lea ua fai foi si faanoanoa, e pei ua saunoa mai, o la e faalogologo mai nai konekarate, o faapea mai, ua atili ai ona tele tupe a leni konekarate o le ave o galuega. Ia te au lau Afioga, e le tatau ona faia ni tatou lafoga faapea. O le mea muamua, e le o i i se konekarate e tali mai ai, ae pei o tulaga ia e tatau pea ona saunoa sao mai i mataupu a lona itumalo, ae aua le lotea fua konekarate. Leaga o le

mea sao lau Afioga i le Tuiatua, o lea e fai faasalalauga, fai tauofoga. O i ina foi la e filifili ai e le Tenders Board konekarate ua ausia uma tulaga e faamalieina ai conditions o le tender, aemaise e pei e foliga mai e tatau ona ave le avanoa i le isi konekarate, o le mea lena ua leaga ai lou auala. Ae se i ta talanoa pe afai le ti, tau mai ia te au le konekarate lena, leaga ou te le manao e tau ae le o i i le konekarate lea na faia lou auala lea na e fai mai ai, saunoa mai e 3 vaiaso ae toe malepe. O ituaiga galuega la ia o lea e puipui, e le gata i le Tenders Board, a o le LTA foi, ia lelei ona faatino auala ma last, ia ma talafeagai i le tupe lea e totogi.

Ae pei o le tulaga lena. Faamolemole lau Afioga i le Taitaifono, po o lavea i le taimi lavea o le saunoaga a le sui usufono leaga ua tele le taimi faaulavea, ae pei o le tulaga lena na ou fia fesoasoani ai i lou uso. O lou uso le Tuiatua, ae leaga e tatau pea ona ou talanoa i le tulaga lea leaga o lea foi e aafia le matou LTA, aemaise foi o le Tenders Board i ituaiga saunoaga ia. Ae faamalulu atu foi i lau Afioga i le Tuiatua pe a ua matele atu foi se faamatalaga, a o lea ou te manao e faasaosao tulaga ia, leaga e tuuaia ai le Tenders Board, toe tuuaia ai foi ma le LTA. Ia se i ta talanoa i tua ona tau mai lea o le konekarate. Ma lou faaaloalo lava.

**Afioga Tafua Maluelue Tafua:** Faafetai lava. E leai se faafinauga lau Afioga i le Fofoga Fetalai. Ua ou tulai atu ma lou agaga faaaloalo o si au lava tuualalo na ave i le Afioga i le...

**SUI FOFOGA FETALAI:** Alaala mai i lalo. Le sui usufono mamalu, e le i faatagaina oe ona e tulai mai. Ou te le faatagaina se faafefinauaiga i le mataupu lea, o lea lava e manino le faafofoga a le Maota, manino le faafofoga a Samoa, e faapena foi i le Nofoa.

E faamalulu atu i le Minisita mo Galuega Tetele a le Malo. O le galuega foi a le Nofoa, e agai lava... first come first serve. Na muamua mumu mai le moli a le Minisita o Faatoaga. Sa i ai le manatu o le mataupu lava lea, leaga o le galuega tuufaatasi lea a le Afioga i le Taitai o le Malo ma le Aiga Kapeneta. Peitai, e ese le mataupu lea, o lea la ua faamuta e le Nofoa ae agai atu i lau Afioga. O lea la ua e saunoa, ia faafetai. O lea foi la ua faafofoga mai le sui usufono mamalu mo Aleipata Itupa i Lalo ia, ua nofo fale foi i le Aiga Satuiamaa le tofa a lau Afioga, aua tulaga ia e tatau foi ona tausi le va i le mamalu o le atunuu o feagai ma tatou konekarate ia, e le faigofie. O la e foi e silafia lava e le sui usufono mamalu.

Ma e talu ai ona o lea ua tatou taunuu mai i le tatou malologa masani o le taeao, ou te faasilasila atu ua faataatiaese nei Galuega a le Maota mo lana malologa masani mo le 15 minute.

*Na faataatiaese Taulumaga a le Fono Aoaofa Faitulafono mo lana malologa masani i le itula e 10:43 i le taeao ma toe faaauau i le itula e 11:34 i le taeao.*

*Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2020/2021.*

**SUI FOFOGA FETALAI:** Ou te faasilasila atu ua toe amatalia nei Taulumaga a le Fono Aoaofa Faitulafono.

E i ai le manatu ua maua foi se lagona fou ma se finagalo fou o le paia o le Palemene, ae a le faamalosiga tino e pei ona tatou i ai. O le mea lea, o le a amatalia Taulumaga o le tatou Fonotaga.

E faataatiaese Taulumaga o le Fono Aoaofa o saunoa le sui usufono mo Palauli le Falefa. Ma ou te tapa le sui usufono e tulai mai e faaauau lau saunoaga ae faasee ese ma mataupu ua uma ona manino ma faamalamalama e le Malo, ae agai i luma le saunoaga. Ma le faaloalo.

**Afioga Hon FAUMUINA TIATIA FAAOLATANE LIUGA:** Faafetai i lau Afioga i le Fofoga Fetalai mo le avanoa e faaauau ai se sao o si ou itumalo i tonufai, ia ma le atiaeina o si o tatou atunuu. O lea sa ou talanoa atu i faiga faavae o lea ou te masani ai ou te iloa lelei, i tulaga o tauofoga faava-o-Malo, ae le afaina o lea ua saunoa mai le Minisita, ua saunoa foi le Afioga i le Palemia ma le Minisita o Galuega, ia o lena ua taatia atu. E le i faigofie foi le tuuina o Ott Transport i totonu, I've twisted a lot of arms, na ala ai ona sao i totonu Ott, o la e silafia o la e faafogafoga mai.

Ae sa taua e le Afioga i le Palemia reconstructions i totonu o Iraq ia ma le Middle East. O au sa ou i ai i le vaega tonu lea, ma sa ou vaaia le faasoasoina o le \$2 piliona tala Amerika every six months. O le mea ua ou taua ai le mea lea, leaga o lea sa taua e le sui usufono mo Faasaleleaga Nu.4, o le latou kamupani na ueloina paipa suauu ia e i totonu o Iraq, a o le mama o paipa, ae le afaina lea, ai po o paipa tuai.

Ae lau Afioga i le Fofoga Fetalai, ia o lea ua matuu atu se vaega i le tulaga lea e pei ona ou... o lou naunautaga lava, ia upgrade le skills o a tatou kamupani e le gata e tauva iinei, ae ia tauva i fafo atu o Samoa. Increase the field, leaga e limited a tatou galuega. O le mea lena o lea ou te naunau ai e pei o le build ina o le tatou... O le tala lava e masani ona ou faia i le vaega lea o donor countries, your vote ia the same as mine. You are a donor country, I am a recipient country, but the vote is the same. E pei o nai au tala lava na fai mea malie i ai, ia ma sao ai lava i totonu nai isi tuualalo.

O le vaega lea lau Afioga i le NPF. I le tatou Fonotaga po o le amataga o le tausaga lea na tea po o ona tua atu, sa ou tuualalo ai i le Afioga i le Minisita,

se i silasila pe tatau ona toe teuteu le Tulafono ina ia tutusa ai benefits o tagata faisafaga faigaluega ma tagata faisafaga, voluntary contributors ona e i ai le eseese. E ala ona ota naunau i le mea lea, o le aoga foi lea o le lelei o incentives e ave i tagata nei e tutusa ma le aufaigaluega ina ia attract ai tagata e ave a latou saofaga i le vaega lea, aemaise lava i nai faifeau. E i ai faifeau e lelei nuu e i ai e tetele, e i ai faifeau e laiti nuu e i ai. Ia ona ou tago lea amata i faifeau o le matou Ekalesia. Ua fiafia lava nai faifeau aua foi e le lava ni tupe e accumulate e o ai i le aiga pe a oo i le taimi e litaea ai, a o nai vaega tonu lava ia lau Afioga se i silasila i ai, leaga na ou fesili i le NPF, ae fai mai faatoa entitle voluntary contributors i mea ia pe a uma le 2 tausaga, a o contributors foi nei tagata faigaluega, e entitle lava i benefits ia soon after joining le NPF.

O le isi vaega lau Afioga e taua ia leaga o lea e sau a i ou taliga penisione nei a le Palemene, penisione a le au Faamasino, aua afai tatou te tuua, e pei foi o nai o tatou uso ia o le a tuua nei le Palemene, e le gata la i le maua o latou penisione foi nei tagata matutua, ae o le a maua foi latou penisione o tatou faiga saofaga ia e ave i le NPF. Ia, o le isi faataitaiga; o Sui o le Fono a Sui Tofia pe afai foi o le a o ese. O le Ao o le Malo, ia o le Palemia, ia o Minisita, ma tatou uma lava nei. A tatou o la, e le gata la o lea e maua le \$160 i masina taitasi, a o le tele lava o lau tupe e togitogi ai lau penisione, e increase ai, leaga o lea ou te faalogo i le tulaga lea, e leai ni mea o faia mo tatou nei e galulue i galuega faapenei. E ala ona tuu atu lau faamatalaga lea lau Afioga i le Minisita o Tupe ma le tatou Faigamalo, e tatau ona silasila i le vaega lea leaga o lea e faapea e tatau ona fai ni mea mo i latou sa galulue i totonu o galuega a le tatou atunuu, aemaise lava i le taitaiga o le tatou atunuu.

O le isi vaega lea sa ou taua lau Afioga i le Fofoga Fetalai, leaga o le olaga sa ou ola ai, mea ia o tamaiti lea e faatau mea i auala.

**SUI FOFOGA FETALAI:** Malie le sui usufono o lo o saunoa se i tuu atu le avanoa i le Taitai o le Maota.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, faafetai foi i le sui usufono ua laga le mataupu lea, e taua i le faafogafoga mai a le au mau tofi. O le tausaga e 1996 lea na faatoa amata ai le faiga lea, o le fai o mea nei o penisione litaea mo tatou nei. E le gata la i le Palemene, ae faapea foi ma Le Ao o le Malo ma Sui Tofia. O le tulaga taua, i le taimi lena o 5% saofaga, ae siitia faapitoa ai le saofaga lea i le 10%, o lona uiga ua double up. O le sao lea o tatou, e fai uma e le Malo. Ia manatua foi o lea e totogi tatou e le Malo ona toese lea o lau 10% ae toe fai le sao o le Malo. O lea la e tusa e fai lava si tele ua 20%. O le 20% la lena, e vave tele ona tupu. E oo ane la i le uma o le 5 tausaga lau Afioga i le Fofoga

Fetalai tulouna lava, se o le amoga ma le faafafa e tala i tua. O le mea la sa i ai le agaga o le faamoemoe, e aveese le vaega o le afa o lau saofaga, o lona uiga o lau saofaga na fai mai lou totogi, ae taofi pea le saofaga a le Malo, e tusa o le mea foi lea e afa mai lou totogi, afa e avatu e le Malo. E uma ane le tatou tai 5 tausaga, o le matua tele o tupe ia. Ae sa i ai la le agaga foi lea, o le isi vaega e mafai ona tala mai i tua, ina ua uma le Nofoaiga, a o le isi vaega e tuu ai pea i totonu e te tua i ai. O le mea la lena o le litaea. O le litaea la lea, e tusa o lea e fai uma lava e le Malo, ona o lea e totogi oe e le Malo, a o lea foi e toe fai e le Malo le isi 10%. O le 10% a oe lea e sau mai lou totogi, o lea e totogi oe e le Malo, ma 10% a le Malo. Ua fai la si tele o le saofaga, a o tagata faigaluega, e na o le tai 5 lava. O le ala la lena, o lea na ala ai ona uunaia, ua leva ona uunai e le Kapeneta le Board a le NPF, fai foi faapea, ona o lea ua iloa e le Kapeneta, le maualuga tele o le seleni lea e fua i lou totogi. A o le au maotofi lea e i ai tatou, Sui Tofia, e faapea foi ma Le Ao o le Malo, ua matua lava ma totoe le mea lea e te tua i ai. E oo i le taimi e te litaea ai, ona faasolosolo atu lava lea o au litaea mai le galuega, penisione litaea, faapoo atu i luga o le tatou penisione lautele, o le matua tele lava o le mea lea e te ola ai. Afai lava la e nofo le tagata ia ma tala uma i tua ae leai se vaega e fuafua mo lona litaea, o ia lava la le mafuaaga o lona faaletonu. Ae mafai ona faaoga lau litaea lea, aemaise lava tatou nei, faatau ai lau taavale, ma e soifua ai, sau ma le penisiona e te olaola lelei ai. E oo atu foi i le taimi lena, ua galulue lau fanau, e uma lelei lava le masina toe sau le isi i le mea lea o le fuafua tatau.

Afai la o oe e te fia ola i le soifuaga foi lea e te tausami i le taeao breakfast i le isi faletalimalo taugata, lunch i le isi faletalimalo taugata, dinner i le isi faletalimalo taugata. O au lava la tifaga, faitalia oe ma e ola ai, ae le faapea o le a e tagi mai e avatu tupe a le atunuu, e fai ai lou soifuaga ua maualuga. E le tatau ona sao atu fua le atunuu i le tausiga o oe. O lea la, o tatou la nei, ia mataitu lelei, na ala ona fai le mea lea, ona o le manatu o le Taitai o le Malo i lena taimi i le 1996, matou talatalanoa ai foi faalauaitele. Se e le o se mea matagofie le mea lea e tulai mai ia tatou nei i totonu o le Maota lenei. E i ai le isi toeaina na litaea i le tausaga e 1988, e le i litaea i lona ia lava loto. Ae ua litaea ua faatonu e le itumalo, e malie ia ae ave le avanoa lea i le tatou Alii Sili, ona nofo ai lea. O lea la ua ma fetau i le isi taeao, “o le a alii le mea o lo o e ola ai i aso nei?” Fai mai le tala a le toeaina, “o lea ua ou ola i le fue ma le tootoo.” O le a le uiga o lau faamatalaga, “e oo loa i le taeao, ou taele, ou tago loa i lou tootoo ma lou fue, ou oso i le pasi ou tietie loa i Mulinuu. Po o ni faamasinoga lava e fai i ina, e tu ai lava lou tootoo, e uma ane le aso ua lava si mea ou te ola ai. O lea lava la ua ou ola i le olaga faa-Samoa moni.” O le tulafale e leai se galuega, ua ola faapea ae sa mamalu i le taimi sa tulai atu ai o le sui usufono. O le faamatalaga la a le matou Taitai i lena taimi. Se matua mataga tele lenei mea, o le tulai mai o le sui usufono e ifo uma i ai le aufaigaluega a le Malo, ae vaai atu ua fealua'i solo e pei o se

tagata foi lele aisi i le taulaga, ma le fue e tau sue po o fea le mea la e potopoto ai se toa-lua po o se toa-tolu, ona afe loa lea i ai, ae fai le lauga.

Lau Afioga i le Fofoga Fetalai, o lea la ua taoto le faavae, o litaea o le tofi, e faaopoopo atu i lou litaea ina ua 65 ou tausaga. Lau Afioga ma le mamalu o le Maota o se toomaga lelei tele mo i tatou nei o le a nonofo ma le Maota. O lea la na ou talanoa atu nei i lou uso lea e nofo i ou tafatafa. “O a alii au mea a fai, pe a e nofo nei?” “O... o la ua matua lava si au litaea, o le a ou litaea lava ma ou nofo ai, ma ou matamata mai ia outou mea ia e fai.” Lau Afioga i le Fofoga Fetalai, o le tulaga foi lena, e faaosofia ai foi le fia litaea. Ae a na leai la le litaea lea, e toe alu foi i le faiga palota.

Lau Afioga i le Fofoga Fetalai, e pei o se faaopoopo atu lena ia tatou nei, ua tataua ona litaea a o lea e alu lava, ona o le manatu la i mea ia. Lau Afioga i le Fofoga Fetalai, o le tala lena, aua o lea ou te vaai atu i isi, e pei ua matua atu ia te au. A o au lea ua fai si matua, a o lea ou te talavou atu i lo isi o le vaega ia e feoi solo ma pei ua matutua tele.

Lau Afioga i le Fofoga Fetalai o le fesoasoani atu lena, e taua tele le mea ua oo i ai le saunoaga a le sui usufono.

**SUI FOFOGA FETALAI:** Ia malo saunoa. Ia malie le sui usufono mo Palauli le Falefa, se i tuu pea le avanoa i le sui usufono mamalu.

**Afioga Hon Tuitama Talalelei Tuitama (Minisita mo Tina ma Tamaitai, Atinae o Nuu ma Afioga ma Agafesootai):** Leaga o lea sa taua lou sui usufono nei i le saunoaga i le Afioga i le Taitai o le Malo. Ma ou te tulai atu e lagolago ma le faamaoni ma le sao lelei le folasaga a le Afioga i le Palemia. Ma ou te fautua atu foi i le tatou Maota, tatou litaea faatasi. Manuia le Fono lau Afioga.

**SUI FOFOGA FETALAI:** E taua foi le finagalo o le sui usufono mamalu, e tasi lea sui usufono matua i le Maota o Palauli le Falefa. O lea ua faafofoga le Palemene ma Samoa, e taua foi tulaga e pei ona faailoa. O le mea la lea, e tapa lau Afioga e faaauau lau saunoaga.

**Afioga Hon FAUMUINA TIATIA FAAOLATANE LIUGA:** E faafetai atu mo le avanoa, faafetai atu i le Afioga i le Palemia ma le Afioga i le Minisita. O si au uo e aumai ai ou ufi, o le tele o togauafi, e tasi lena mea e ala ai ona litaea le Afioga i le Minisita. E tele togauafi, tele togakoko ia tele foi togafai. Ua faamalo galue Tuitama.

O mataupu ia e, o lea o le a tuufaatasi ona o le taimi ua utiuti. O street vendors, o school drop outs ma malae taalo. E relate uma issues ia o le a ou le avatua taitasi. E ala ona taua ia te au tamaiti nei e feoi ma faatau oloa, leaga o le olaga sa ou ola ai. Ou te ola e taumafai e fesoasoani i ou matua, fesoasoani i le matou aiga, fesoasoani foi i isi mea ma lou pili ma lou pasese

ou te fealuai ai. Aua fai mai le mau a nisi o le aufaigaluega a le Malo, ua le aoga ai tamaiti. O lou alu e te faataulia au oloa, its a practical training. E leai se, ou te tago test tamaiti nei, ou fai atu, “o le vasega fia na e te i ai,” ae fai mai, “ou te le o toe aoga.” Ou fai atu, “o le a le vasega na gata ai lau aoga?” “Year 6.” Ou fai atu, “ia fai mai la le faa-6.” Ae vaai la i le alu o le faatele. Ou fai atu, “e te iloa faaopopo.” Fai mai, “ioe.” Ou fai atu, o ai lou igoa? Ia tau mai le igoa. “Tago e sipela.” E iloa, o tamaiti nei, ua sauni i le olaga latou te iloa e comfortable ai. O lea e mau le tulaga faapea, ua tatou faafaigaluegaina tamaiti. E leai tatou te le o faafaigaluegaina, ua muta le malosi faale-mafaufau. O la la ua alu e sue le isi mea e sue ai lona lumanai. Na fai le faalelegapepe i le tausaga lea na tea nei, na ou faalogo ai i le ie e aupito sili ona lelei ma matua manifinifi le tosiina o le ie lea, ma e numera tasi. A o le teineitiiti ou te iloa e le atoa le 12 tausaga na lalagaina. O la ua toleni e faatina, o lona uiga, e le o le lē aoga, o la ua iloa e lenei teineititi o lona lumanai lea.

E faapena uma lava tatou, a ou alu ou te mafuta i fonofono a nuu, o lau tilotilo i taulelea, ou te iloa e amata atu lava i le 14, 15 po o lalo ifo foi taulelea. A o le tautala i upu e folafola ai mea o le matuai maai. E te maofa ai, se i alu la se isi o alo ma fanau ia e nonofo i le taulaga i ituaiga mea ia, lau Afioga i le Fofoga Fetalai, e matua susu atoa le ie i le mea e nofo ai, pe a fai atu e fai se folafolaga o mea ia e taatitia i le fale. O aoga uma mea nei, a o lea ua nonofo tatou fai mai e aua le a, aua le a. O lau tuualalo, Tuitama ae te le i nofo, fai se Tulafono, e puipuia ai tamaiti e pei o au. Sa ou faatau mea i le auala, sa ou faatau fili tapaa, sa ou faatau tipi, savali e faatau. E fai le sali mata alu fua, e pei ona ou fai atu i le aso ananafi, o au le isi aeaie niu a na faapea e i ai ni tuuga i le taimi na ou ae ai, e leai sau paga i le mea lea o le ae niu.

**SUI FOFOGA FETALAI:** Ia malie le sui usufono o lo o saunoa, se i avatu le avanoa e saunoa ai le sui usufono mo Faleata.

**Tofa Lealailepule Rimoni Aiafi (Faleata Sisifo):** E taua le vaega ua oo i ai le saunoaga a le sui usufono mamalu. O le faiga lava lea o maua ma lau Toeaina, a eseese lava o ma manatu i se mea, e faaali lava. E manaia le finagalo ia ia lava, ae o fea la e i ai nei? A lea ua i i i le faipule, sa Minisita. Ae o le popolega o lou mafaufau, ne i te i ua faaseseina le lautele i le finagalo. Ona e taua le finagalo i le Maota, e moni a au, o taimi ia, sa tatou faatau uma lava i mea nei, o mea e maua i o tatou laufanua, i afiafi tatou te o e fai faatau. Ae o le popolega lea i ai, le mea fou lea ua i ai nei, ma aumai mea ia a Saina i faleoloa ma mea faapea, o lea ua tele...leaga o lea ou te fai atu, leaga o lea e tupu i lou itumalo ma le taulaga, e seasea tupu i Savaii mea nei ma tua. Ae manatua foi le manulauti a le Malo, o le ala tonu lava lea ua faaaooga fua ai tamaiti. Ia tulei tamaiti e o i le aoga, e pau lava lea o le mea



e saoloto ai le tamaititi. E lelei le fingingalo o le sui usufono mamalu, ae o le popolega lena, aua a faapea nei e fai ma se tulafono. O lea ua uma le Tulafono, aoga compulsory education up to 14 tausaga, ae tatau ona tuu atu i tua i le 18. O le popolega lea i lou talitonuga lau Afioga i le sui usufono mamalu. Ona e faaeteete foi ma popole ina ne i feteenai o tatou finagalo ma le faafofoga mai o le atunuu. Ma le faaaloalo lava.

**SUI FOFOGA FETALAI:** Faafetai i le faauilavea a le sui usufono mo Faleata. Ia malie Faumuina se i toe tuu atu le avanoa i le Afioga i le Minisita o le Matagaluega o Tina ma Tamaitai, Atinae o Nuu ma Afioga ma Agafesootai.

**Afioga Hon Tuitama Talalelei Tuitama:** Faafetai lau Afioga, ona o lea sa taua le Matagaluega i le lauga. Sa ou musu lava e faalavelave, ae o lea ua maua le avanoa, e tatau pea ona fai se tuualalo a le tatou Matagaluega. O le mataupu lea sa taua e le Afioga i le sui usufono mamalu, e le o se mataupu faigofie, ua leva foi ona tilotilo i ai le Malo. Ma e faatalanoa soo foi i totonu o le Kapeneta, e ala foi i le tele o nisi faitioga i tamaiti nei e faatau savali oloa i le auala. Ma talu ai, o lea foi sa tau uunai i nai malu o le Malo, ina ia fai ma a latou galuega le vaavaaia o i latou nei. E 2 Tulafono lea o lo o i ai i le taimi nei, e aafia ai le tulaga lea. Muamua, o le Tulafono o Aoga, i aoga lava ia, a o lea lava ua faamamalu le 4 tausaga i le 15 tausaga e compulsory. Pe tatau ona i ai i le aoga i taimi e faatino ai le aoga, o le taimi la lea o lea e i ai le malosiaga i leoleo, latou te mafai ai ona taofia tamaiti ia e faatau oloa i le auala i le taimi o aoga. Aua sa tatau ona i ai i totonu o le faleaoga, i le tupulaga lea.

O lona lua la, o le faatauina o oloa i taimi e ese mai i lo taimi aoga, e leai la se malosiaga o leoleo e taofi ai latou nei i taimi, aua o le latou saolotoga lea i matua. E leai se tatou Tulafono o i ai, e faasaina ai ona faatau e tamaiti ia oloa. Ma o lea foi sa molimau lava le Maota lenei, e pei foi ona molimau le sui usufono o lo o saunoa, o le tasi lea o amataga o le isi foi faipisinisi taua o le atunuu o lo o i ai i le taimi nei, mai o latou amataga. E le o le agaga la lena ua ala ai ona le faatinoina se matafaioi a le Matagaluega ma le Malo, ia i latou nei e faatau oloa. Ae o le tulaga lea ua fautuaina ai nei matua, ma le popolega lea ua i ai, ona o le saogalemu o fanau iti i taimi ua pogisa, a o lo o faatino pea le faatauina o oloa. O le concern la a le Malo lea ua i ai nei, ma o lea o lo o faagasolo i le taimi nei. O lea ua uma ona pasia e le Kapeneta le faiga faavae, mo le puipuia ma le saogalemu o fanau iti, o lea o lo o o faagasolo i le taimi nei. O lea ua tuuina atu i le Ofisa o le Loia Sili, o lo o galulue ai mo le tuufaatasia o se Tulafono, e silasila i ai i le puipuiga o tatou fanau iti mai tulaga ia. O le fesoasoani atu lea ma le faamalamalama atonu e aouliuli. Atonu e sau se taimi ona silasila totoa lea i ai ina ia aua ne i toe

tupu mai le tulaga lea ia tatou fanau, e pei ona i ai le popolega o le sui usufono o lo o saunoa.

Ma o le tasi, o lea sa taua le ie Samoa, ma o lo o faafofoga mai ia Komiti a tina ma tamaitai o lo o nafa. E tele tele le galuega a le Malo sa faia i lea tulaga. E mai le 1913 amatamata mai ai, ma le naunautaiga o le tatou Malo. Ina ia aveesea le ie lapoa mamafa lea seiloga o taulelea masomasoa e amo maia se ie tele, e faatino ai a tatou faale-aganuu faa-Samoa. Ae liliu loa i le lalagaina o le ie lea ua taua nei o le ie Samoa. O lea foi ua avatu ma le fua, e 9 i le 12 futu le tele o le ie ina ia ...ma avatu foi ma le faanumeraga, numera 1, numera 2, numera 3. E fua i ai le tosi e tosi ai le laufala. O le numera 1, o le tosi tasi lea e tasi le milimita, o le numera lua, po o le tosi lua e lua milimita. Ma le numera 3 po o le tosi 3 foi e 3 milimita. E talu ona fai le tosi tasi, ia uma lava ona lalaga na ie, e le o toe manu ae se ie i luga i le faiga o se faalavelave. Aua foi ua taugata le ie lea, ona ua lelei lona lalagaina. Ma o le tau talatuu mai o lea ie, \$5,000. Ma ua i ai foi la le popolega o le Malo, ua lalaga lalaga ie nei, a o lea ua le aliae e fai ai faalavelave, a ua maua ai le..a o se income lelei mo tina. Ae o le fesoasoani foi a le Malo lea ua ave i ai, a lalaga loa lau ie, ona avatu loa lea o le \$1,000, ina ia faatupulaia ai pea le faafiafiaina ai o le tina, ma fesoasoani ai. Aua o le taimi lea o le a alu i le lalagaina e tusa ma le 6 masina, e lalaga ai le ie e tasi. A o le mea lea ua tupu mai, o le tele o tina o lo o naunau e lalaga le ie, e le o i ai le tomai. O lea foi la ua liliu le Matagaluega e fai aoga, o lea ua fai aoga i le tapenaga o le lauie, le tosiina o le lauie, ma le lalagaina o le ie Samoa. Ina ia tofu silafia uma e tina uma o Samoa, i latou o lo o i le talafatai o Apia, ma le faataamilosaga o le taulaga, ia faapea foi i latou i nuu i tua, ina ia silafia uma le lalagaina. Ua fai foi asiasiga a le Matagaluega, e asiasia ai toga u'a aua le siapo faatasi ai ma toga lauie, aua le lalagaina o le ie Samoa. Ma e sao lelei le saunoaga a le ...o lea ua oo lava i fanau iti o lo o i ai tatou tama teine ua le toe aoga. O lo o liliu i ai le silasila a le Matagaluega, ia faaaoga i ai le avanoa lea, e saili ai ni a latou seleni.

O le faalelegapepe lea na uma atu nei i le tausaga nei, e toatasi le tina toetiiti lava lata i le \$20,000 lana tupe na maua i le faalelegapepe lena, e ala i ana ie sa lalaga. Ae le i faatauina la lena o le ie, o lona uiga a faatau ie ia e tusa ma le \$5,000 lea e faatau ai i atunuu ia o Toga o Amerika o Hawaii, lea e saili mai le ie Samoa iinei e avatu ai. O lona uiga e \$100,000 le tupe e maua i ia ie e 11 ie, i lau faitau atu i ai i le faalelegapepe lea. O se tamaoaiga tele lava lea, e fesoasoani i tina o lo tatou atunuu, mo le faaaogaina o le latou tomai ma le taimi mo lea foi tamaoaiga silisili. Ma tapue ai foi ma le faatinoina o le tatou aganuu ma le tatou agaifanua. Ou te talitonu ua malamalama lea tulaga ma le agaga faaaloalo. Manuia le Fono.

**SUIFOFOGA FETALAI:** Se i malie le sui usufono, se i tuu atu le avanoa i le sui o Anoamaa Sasae.

**Afioga Alaiasa Muagututi’a Moefaauouo Malagaitutogiai Sepulona Moananu (Anoamaa Sasae):** Ona o le taua o le mataupu lea ua oo i ai le saunoaga a le sui usufono mamalu. Sa ou nofonofo lava, e tele lava isi mataupu ia sa laga i lana lauga o lo o faaauau nei. A o le matou faitau i le mea lea o tamaiti foi ia e faatau oloa i luga o... o le popolega foi lea e aliae soo mai i fonu a tatou Komiti foi lea Fauaufautua, aemaise lava i Komiti o Aoga. O lea e vaavaai i se faiga foi lea, ina ia vave ona foia. O lona uiga e tatau ona taulamua atu i le tatou Maota, le avatu o se fautuaga, ina ia ...Aua e tasi lenei indication o le mea o le poverty i atunuu. O lona uiga e tatau ona avatu e tatou ni tala mai le Maota e faaitiitia ai le tulai mai pea o le mea lea. Leaga ua tele foi, ua uma le faatau o mea i le leva o le po, ae ua oo i le mea o le faaoolima ma isi mea faapena, o se faafitauli tele ua tulai mai. E i ai foi le saunoaga a le sui usufono sa taua ai le... tagata foi ia e o i le masini lea o le dialysis, e faapea o tagata ua fefefe e feoti. O au e i ai si ou tuua, o alu nei i le mea lea i le taimi lenei, ma ou te faanoanoa i lea lafoga. E leaga o le tiute lea o le Malo, e sailiili ni mea e aoga mo ona tagatanuu, leaga e taua le ola. E i ai foi nisi tamalii sa o ai i le dialysis, ae sa o ai ma Ofisa Sili o Pulega o Matagaluega. O la lava e i ai le agavaa ma le tomai e faaauau ai le latou auunaga. O nai mea ia lau Afioga sa ou pikia, a o le isi mea, o lea sa talanoa le isi sui lea i le 6 masina talu ai. Ae pei o lea e agai mai le sui lea i le 20 tausaga talu ai ma mea na tutupu ai. Ma le agaga faaaloalo e fesoasoani atu ai i le tatou Fonotaga. Manuia le Fonu.

**SUI FOFOGA FETALAI:** Ia malo le saunoa i le sui usufono faatoa faamaui atu nei lona finagalo. E fautuaina foi le saunoaga a le sui usufono mamalu o Palauli le Falefa, i le taumafaiga foi o tatou Tulafono e aafia ai alo ma fanau a le atunuu. E i ai lava foi nai popolega. Ae lelei pea ona tuutuu i le loloto le upega, ona... o au le isi sui sa taitaifono i le Task Force na merge ai le Matagaluega o Leoleo ma le Matagaluega o Aoga. I le taumafaiga o le mataupu lenei, ma ia uunaia tamaiti i le aoga, i lo le o i mea ia. O lea e taua ai ia te au le faauilavea, ae peitai o le finagalo lava lea o le sui ia i lana tapenaga ma lana silasila mamao. A o le fautuaga a le Nofoa, leaga o la e faafofoga mai le atunuu. E lelei lava pe a talanoa pea i le tulaga... ua tele foi taimi na alu o le Malo ma le taumafaiga ina ia foia faafitauli ia. O so o se atunuu lava e atamamai ana tama fanau, o se atunuu manuia. Ae i ai foi le tulaga o le naunau o le fia o e ao mai ai foi, e pei ona saunoa le sui usufono. O le fautuaga a le sui usufono, o tua atu o mea na, o lo o taoto ai le galuega sa faatino i le i ai o solitulafono e tulai mai. O le ala lena o le matamata pea i ai, ae o le finagalo lava lea le sui. O le mea la lea, ou te tapa le sui usufono mo Palauli le Falefa, e faapena se vaivaiga o le Nofoa, ae tapa lau Afioga e faaauau le saunoaga.

**Afioga Hon FAUMUINA TIATIA FAAOLATANE LIUGA:** Faafetai o lea ua, e i ai le muagagana foi lea, “E te fiu lava e ave le solofanua i le vai e inu ae le fia inu.” Ou te iloa o saunoaga ia na saunoa ai sui mamalu, e le o faitau i lipoti. I le lipoti a le Matagaluega o Aoga lea e lata mai nei, i le Vasega 1 – Vasega 8, e 43,000 tamaiti aoga. E aofia ai aoga a le Malo, o aoga a Lotu ma aoga Tumaoti. Ona oo lea i le Vasega 9 e tau i le Vaega 13, e na o le 16,000, lea ua faaauau le aoga i luga atu. O le fesili la, o fea o i ai le 20+ afe? Ia tatou o mai loa la e faavasega i lalo, a fai la o lea ua o mai le 10+ e o e faaoga taaloga, ia ma isi mea. O lona uiga e i ai lava le vaega lea e misi i i, o tamaiti ua le toe fia aoga, ua muta le malosi o lona fia aoga. O le tulaga lea faapea o lea ou te taumafai e faalototele tagata e fai le mea lea. E leai e le o lena, a lea na manino lava lau fai atu, e manaia pe a fai se tulafono o tagata nei ua disadvantage, o tagata tonu lava na o lea e i ai le faamoemoe lea e pei ona ou fai atu ai. Ou te le o taumafai lau Afioga i le Fofoga Fetalai, e faamaite ni mea e faatupu ai le ola faalagolago ma faapalapala. E tasi lea auala e mafai ai ona tatou, fai ni tulafono e fau ai le taimi ma oloa e mafai ona faatau e lea tamaititi ma lea tamaititi. O lau taavale e tumu i siliva, e ala ona tumu i siliva, e sau loa le tamaititi ia au, ou fai atu, e leai, o lea e i ai lau... ae avatu au siliva ia e te alu. O lea ou te vaai i le tamaititi lea e sau, o au tonu lava lea, ou te le o fai atu la a mea tatou te o e fai le vaega lea. E i ai le isi alaleo Lotu, ou te le tau atua le Ekalesia, o le aualii lea e fai a latou polokalame foi ia, e pei e foliga o tagata e fiafia i le faaolaina. Ae oo loa i le tamaititi lea fai mai e faatau oloa, e fai mai e faatau oloa faatau oloa lava alu gaioi. Ona ou faanoanoa ai lea i nei ituaiga tagata faaolaina.

**SUI FOFOGA FETALAI:** Se i tulai mai lau Afioga i le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Ou te iloa o le mataupu lea, o se mataupu e faigofie ona e i ai tamaiti o la e faatau mea ia ma o i le aoga. Ae i ai foi tamaiti e faatau mea ia, ae ua le tutulia e matua i aoga, e i ai lava uiga vaivai. Ma ou te lagona foi o le tulaga lena o lea e faatino ai le Tulafono i le vaaiga. E pei lava o lena e te molimau, a o lea foi ou te molimau, o la lava e feoai lava tamaiti, o la e feoai. O le mea lea e inaina ai tagata, o matua e le ave a latou fanau i le taimi o la e fai ai aoga, a o le taimi o la ua leai ni aoga, o la e fesoasoani matua i le faiga o mea ia, ia e leai la se mea e afaina ai. O so o se mea lava o le olaga lena, e tatou te faia lava ma le faautautaga tatau. E oo foi la i leoleo, o la foi e faatino e leoleo i le latou foi faautautaga tatau.

Lau Afioga o le tulaga sao lena o lea e i ai. E, ua faafia ona ou alu atu foi au ou te alu e faatau au vai ia Maria Westerlund ia o la foi e feoai mai i fafo. Ia ona ou faia foi lea o le mea lena e te faia. Aua o lea foi ou te vaai atu au i

tamaiti nei, o lea ou te vaai i lou ata i mea sa ou faia. E aafia uma ai lava tatou sa faia le mea lea, e i ai le agaga lena ae e i ai foi ma le agaga, e tatau i matua ona uunai a latou tamaiti nei e faaaoga.

Ae o fea lava le mea e tatou te taumafai e tatau ona fai, ia e tatou te o lava i le mea e maua ai le tali. O le mea e maua ai le tali, e tupulua le saito ma le titania. E tatou te taumafai e fai ia faiga, ae e i ai lava mea e tutupu. O lea foi na fetalai ai lo tatou Alii, 'e tou te nonofo pea ma tagata matitiva e oo i le faavavau'. O lea lava e i ai le tali o mea uma, a o le Tusi Paia foi lena e te faitau ai, o lea e tatou te faitau uma ai lava. Ae o lea ua tali atu le Minisita, o lea foi ua faaali mai lou finagalo, o lea e i ai le faautautaga tatau, i le faatinoga o le Tulafono.

Lau Afioga i le Fofoga Fetalai, o lea ua tau fai fetai uma tatou i le moa o le auala.

**SUI FOFOGA FETALAI:** Ia malo saunoa, faafetai i le faamaninoga e lau Afioga i le Taitai o le Maota, manatu le sui usufono mamalu ua manino le mea lea. Ae e lelei ona faasee ese loa e le o toe umi foi ia sou taimi.

**Afioga Hon FAUMUINA TIATIA FAAOLATANE LIUGA:** Faafetai, faafetai i lau Afioga i le Fofoga Fetalai. E a foi lea e tele taimi lavea lea e... ae le afaina. Ae o le tulaga lea ia tatou malae taaalo, aua e relate i le mea lea e pei ona fai atu ai. I le tulaga lea, ou te iloa e na o taimi e taaalo ai ia tamaiti lakapi mai Palauli le Falefa, o taimi na e manumalo ai ia le Manu Samoa 7s. Ae o le mea foi la lea ua i ai, ia o lena ua outou silasila i ai, o le tamalii foi mai i lou itumalo, lea ua fai nei ma faiaoga o le Manu Samoa, le Afioga ia Vaovasamanaia Seilala. Ia o tama foi o Palauli le Falefa. Ae o tagata foi ia na manumalo ai le Manu Samoa, ia o tamaiti foi o Palauli le Falefa.

O le mea lea lau Afioga i le Minisita o Aoga, le ta malae foi lea, ua lava se tasi mo lenei taimi, ia ona fai fai malie lava lea o le isi tasi, e sue mai ai ni tama e toe malo ai le Manu Samoa, e le gata o le tai toa-7 ia ae o le 15. Aua na pau lava foi lenei o le itumalo e fai ma maua mai ai nai tama saosaoa ma tama e matuai taaalo ma le loto malosi, ina ia manuia le tatou Manu Samoa i le agai atu i le lumanai.

Ia lau Afioga i le... e tasi le isi mea taua lea lau Afioga i le Fofoga Fetalai, leaga e tasi lea mea o lea e tuuaina ai foi tatou o mea nei o le lisiina o fanua faale-aganuu. O fanua faale-aganuu a lisi, e uma loa lisi foi le fanua o le afioaga ia po o aiga taitasi. E i ai aiga e i ai ia latou fanua lisi i le latou lava va puipui faale-aiga, ae i ai foi afioaga e fai le lisi o fanua faale-aganuu, i lalo o le pulega a matai.

O le mea ua fai ai lau faamatalaga lau Afioga i le Fofoga Fetalai, ona e i ai le fanua o lo matou nuu i Gataivai sa lisi e le Vaega lea o le Folesi ua leva. Na uma lea o le lisi ina ua expire le lisi i le 2003, ae taatiatia ai lava i totonu o le lesitala. A o le lisi ua le aoga. O le mea la o lau tuualalo, i le... a uma loa

le lisi, aveese ma le faamaumauga, leaga a o atu tagata ma vaavaai i ai, ma faapea ua ave e le Malo. Ae e leai, o fanua faale-aganuu, o fanua faale-aganuu. Ae o lisi foi nei, e pule lava le aiga ia po o le nuu, pe fai pe leai. Ae e le mafai ona avea faamalosi i se tulaga faapena.

O le tulaga lena lau Afioga i le Fofoga Fetalai leaga e faauiga sese foi i le tele o taimi e nisi foi o latou foi lea o lo o taumafai e faasese ia tulaga o faamaumauga ma mea faapena.

Lau Afioga i le Fofoga Fetalai, ia avea ia lenei avanoa e...

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai...

**SUI FOFOGA FETALAI:** Malie le sui usufono o saunoa se i tulai mai le Taitai o le Malo.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Faafetai foi i le talanoa mai o le sui usufono, ae taatia maia, o au lea e faafoeina, a na e oo atu e faamanatu atu ua leva ona aveese. O le mafuaaga o le mea lea, e i ai foi le tiute ia i tatou, o nuu e omai ai e siaki ma talosaga loa e aveese.

E i ai mea faapena e tutupu. A e guarantee ina se loan, ua oo mai ina ua uma ona guarantee, a e le alu lava la e aveese lau guarantee, e tuutuu ai lava i o, e maua ai lava i faamaumauga. Ae aoga le faatupu manatu, o lea ua faafogafoga mai le Matagaluega, o le taimi lava e oo atu ai lē e faamanatu, soloia loa a. A foi o le tiute lea o le tiute e tau fai tauave lua e le gata i le Matagaluega, ae o le foi e ona le lisi. Po o le nuu po o ai, ia e faapea lava galuega a le Malo e fuifui lua ia le tauaveina o tatou galuega fai.

**Afioga Hon Loau Solamalemalo Keneti Sio (Minisita mo Aoga, Taaloga ma Aganuu):** Lau Afioga i le Fofoga Fetalai...

**SUI FOFOGA FETALAI:** Ia, se i avatu lava le avanoa, tulai mai le Afioga i le Minisita o Aoga ma Taaloga.

**Afioga Hon Loau Solamalemalo Keneti Sio:** Ia, e le faalavelaveina foi le saunoaga a le sui usufono, ae faafetai leaga o lea sa saunoa le Minisita ma saunoa e uiga i a tatou telefoni, ia o le aoga foi lea o le aumai o le telefoni i totonu. Na ou vili nei atu lava i le matou Vaega ae fai mai o la e faagaoioi le malae o le Afioga i le sui usufono. Masalo la atonu e malaga atu i le weekend nei i Salafai, ia ua uma ona fai ia lana... O le aoga foi lea o le uuina mai o le telefoni ou te vili atu fai mai o la e faagaoioi lau Afioga, ma le agaga faaaloalo.

**SUI FOFOGA FETALAI:** Faafetai, ia e na o se fautuaga foi i le Minisita, e aua le vili ae text, leaga o le vili e pei e tatagi faalavelave i le tatou Fonotaga, ae taua, taua le saunoaga. O le faagaoioiga o galuega a le Malo mo le lelei o tatou tagata.

Tulai mai le sui usufono mamalu.

**Afioga Hon FAUMUINA TIATIA FAAOLATANE LIUGA:** Ia e faafetai atu i le Afioga i le Minisita, faafetai atu foi i le Palemia. Ia ou te iloa aua o malae ia e avatu ai nei le \$50,000 ia o malae foi ia e koloni ai e le lakapi ai nisi. E faamalositino ai, e fai ai au pushups ia ma mea faapena. Ae faafetai i le faaaloalo i le Toetaufanua a le Malietoa.

Lau Afioga i le Palemia, leai o lea na ona ou... o le tulaga lautele lea sa ou taua ai mea ia o fanua lisi faale-aganuu, ua uma ona aveese le matou lisi lea, ia ae o lo o i ai lava tagata foi ia taufaasese fai mai ua ou avea le fanua i le Malo. Ia ae o la e lava e manino e leai se mea o i ai. Ae faafetai o lea ua e saunoa mai, ia e pei o le vaega tonu lena na ou taua ai le vaega lea ae faafetai atu.

E tele isi mataupu ia ae o le a taatia e i ai se isi taeao e fai ai. Ae avea lenei avanoa e fai ai sau tala e faafetai ai i o tatou uso a sui usufono ia o le a malolo manumalo. Ou te iloa e le o afio mai le Afioga i le Fofoga Fetalai, lau Afioga Leaupepe Toleafoa Taimaiono Faafisi, malo le galue. Ua loa foi ona e tautua i le Palemene, ia e le gata i Nofoaiga e 3 sa avea ai lau Afioga ma Fofoga Fetalai, ia ae o le taimi foi sa avea ai oe ma Minisita o le Kapeneta. E pei lava ona taua i le aso ananafi i lau Afioga, ia e tele sou sao, e tele foi ni taulaga sa e osia aemaise lava i le taimi o le tatou suiga o le itu auala. Ia faamalo le lototele, faamalo le loto atunuu, lau Afioga ia o ou mama na.

Ia o si ou uso ia Aeau, Aeau ua faamalo le tautua, faamalo saunoa. E le gata o oe sa e nofo foi i le Nofoa lea o le Fofoga Fetalai, ia ae tele lou sao i tatou upufai o Malo. Faafetai i lau tautua, faafetai saunoa, ua loa lou soifua o e auauna i le atunuu, o ou mama na.

Honorable Tuitama, ou te manatua lava le taimi na taumafai ai foi le suiga o le Faavae e pei lava o le 2006, ae le atoa le number a le HRPP. Na ou manatua lava na talanoa foi e toa-2 oulua na o atu i le Itu lea ma faaatoa ai le vaega, e to lou pulou i lou lototele. Ou te manatua a o avea lau Afioga ma sui usufono o le Vaa o Fonoti, sa e naunau lava e fai le aualata e tau i o i Uafato. Na ou fai atu lea e manaia pe a ta o e fai sina ta e alu ifo le toaina lea sa tuutuu ai i luga ona o le taugata. E mafai ona faalaualelei ae le mafai ona faataina. Ia ae malo le galue, ia o ou mama na. Ia ou te manatua lava oe pe a fai ni a tatou fiafia foi lea, e ese le manaia o lau saasaa. A oo foi ina e uosi, a taia le tagata ia oe, e matua afaina lava ma tele lona... ia ae ou te le popole i ai aua o oe o le fomai e mafai ona e toe faia ni manua e ono tulai mai.

Honorable Faasootauloa Pati Taulapapa, faamalo. O lau Afioga foi sa e Minisita. Ia o oe foi o le toeaina, e faigata o oe o le Pule, faamalo le tautua. Faasootauloa, ia faamanuia le Atua i le malologa, ma ia faapena ona lava se taimi, e te mafuta ai ma nai ou alo ia ma atinae foi o lo o feagai ai. Ia i ai manuia o le Atua i lau Tofa.

Mulipola ou te le faamavae atu aua ou te iloa e te toe sau. A e le sau foi i se By Election, ia e te toe sau i le 2026. Alu e sauni mai, o la e lelei le tatou nuu. Sa e lauga i taligalu, ia e leai ni maa i tai e fai ai taligalu. Ae a fai foi taligalu o Manono, ia o fanua o matou aiga e aumai ai le mea. Ae le lava ni maa o i ai, ae se i sue ni maa, ia ona maua lea o se mea e fai ai taligalu o le ta nuu i tai i Manono. Ia manuia tele le tatou faatasiga Mulipola, ia tui mai le mulipapaga e tautua ai lo tatou nuu i tai, ia ma i ai foi nisi galuega e faaoga ai lau Afioga i lo tatou Malo po o nisi foi o kamupani, pisinisi o le a e feagai ai.

Ou te iloa o lea e i ai le ao pogisa i le Maota lenei.

**Tofa Hon Faasootauloa Pati Taulapapa (Gagaemauga Nu.2):** Lau Afioga i le Fofoga Fetalai...

**SUI FOFOGA FETALAI:** Malie le sui usufono o lea toetiiti lava maeana saunoa masalo o sau faafetai, e faafetaia... po o le sao lea, pe e te faauilavea i le tulaga o le lauga?

**Tofa Hon Faasootauloa Pati Taulapapa:** Faauilavea faamolemole.

**SUI FOFOGA FETALAI:** Malie le sui usufono o saunoa Palauli le Falefa se i tulai mai le sui usufono o Gagaemauga Nu.2.

**Tofa Hon Faasootauloa Pati Taulapapa:** Ia faafetai i le sui usufono o le itumalo o Palauli le Falefa, ua na taua lou igoa. Ae avea ai lenei taimi ou te fia fai ai sau tala ona ua avea le faaali mai e le sui usufono mamalu ma maua ai le avanoa se i fai atu ai sau tala i si ou itumalo, ona o ananafi sa... o lou atalii... e lelei le tau o lou atalii. Ou te le malamalama, ua ou fiu e fai atu i lau fanau e faailoa mai ia te au le mea o le facebook, ae le tau maia. Ae ua ou te i ananafi, fai mai lou atalii pito laitiiti lava, dad, se i faitau ae i le mea lea. Ou fai atu se i aumai.

O le mea lea lou itumalo e, ou te le i sola. Faafetai mo mea uma na ou foi atu. E le o oe foi, ae o le mea lea ua tulai mai, o lea o le a vevesi ai nisi o le matou aiga. Vili mai le matai o le matou aiga i Savaii, o la ua tali atu i le faitioga lea e aumai ia te oe, ua talanoa le Palemene, ua aveese le sui usufono o Saleaula. A na le seanoa Laauli ma Vaa, a la e nofonofono le sui usufono Faasootauloa Taulapapa Pati e le o tautala.



O le mea lena lau Afioga i le Fofoga Fetalai, e faapena lou uiga, ou te le sii soo, ou te le tautala soo foi. Ou te lotomaulalo, ou te agaga faamagalo. E leai sau faitioga foi i latou na fai mai. O la e lelei Laauli latou, ma mea tou te faia. A o au lava, o lea ou te nofonofo lava, ua ou matua. Ua ou le toe manao foi e feosoosofai. Ua ou matua.

Lou nuu, o lea ua uma ona ou faamavae atu, uma foi ona ou oo atu. O lea ua pulea e au lou loto. O lea e tou te iloa, e tautala galuega. Pe ou te tu i luga pe ou te talosaga, po o le a sau faamatalaga, ia o lena e tou te iloa mea na tulai mai i lou taimi. Ou te le fai atu e tau tolaulauina atu ni mea. Ae o le agaga faamaulalo, Saleaula, o lea ou te fai atu, ua ou pulea lou loto. Ua ou faamavae atu, ou te musu, ua ou matua ua oo foi i le taimi ua tatau ai ona o le finagalo le Atua ou te nofo.

O le mea lea ou te tatalo atu ai, lau Afioga i le Fofoga Fetalai, ou te le faaleaga i se isi o lou nuu, ae pau o le mea, ua ou fai atu i si ou aiga, mau pea le toovae. Aua tou te faalogo i tala pola e motu i tua. Ae maua le fealofani nofo lelei i le nuu, o le uiga lena o tatou nuu. O le uiga foi lena o lou sui usufono tulai mai. Ou te maua le agaga o le onosai, faapalepale, lotomaulalo, faamagalo.

O le mea lea ou te toe tatalo atu ai Saleaula, e oo i Salamumu, e masani na toe foi ni sui usufono na muamua i le nuu? O au e le masani ai, ae na ou oo i Salamumu. O le faamatalaga fai mai o la e nofonofo. Na tatou o Saleaula e vaai le Palemia ma le Kapeneta. Ou te le i nofonofo, na tatou o na logo atu lo tatou nuu o sii mai i Apia ae ou te le i nofonofo.

O le ala lea ou te faafetai atu ai i lau Afioga i le Fofoga Fetalai, o lea ua maua lou avanoa ou te faamalamalamaina atu ai. Manuia mea uma, faafetai i lau Afioga i le Palemia ma le Kapeneta. Faafetai i sui usufono mamalu uma. Faafetai foi i sui o lo o faapena ona alofaiva mo le Palota o lea ua ou tatalo i lo tatou sui ou te le o sola gugu. Saleaula, mau pea le toovae. E pule le Atua, o ai e filifili mai o la foi ua faalogo ia.

O lea e le i faia sau tala i lo tatou nuu, ae o lea ua ou fai atu, o lea na outou fesili mai ia te au o lea e tou te faatali mai. Ae ou fai atu se i i ai se taimi. Ua uma ona ou fai atu ua ou faamavae, lea ua i ai lo tatou sui. E i ai se taimi tatou feiloai foi, a o le agaga faamaulalo o lou sui usufono, ia agalelei mai le Atua, ina ia faamanuia lo tatou nuu Saleaula, faamanuia ia Salamumu. E leai lava ma sau tala o faia faapea ua aveese le sui usufono. O lea foi ou te nofo ma au, ma lau lauga na ou lauga ai foi, ‘Tuilaepa, afai o se mea faataitai, ia e pule le Atua. E i ai se taimi o ai e toe tulai mai, ia toe soalaupule toe sui mea i tulaga’, ae e leai lava sau tala o faia.

Saleaula, e mama la outou sui usufono i mea uma lava, ma lou agaga faaaloalo, manuia le Fono.

**SUI FOFOGA FETALAI:** Faafetai, e tulaga ese foi lenei taimi i le Fonotaga a le Palemene ma le Maota lenei. O lea ua saunoa le tama matua

lauga Saleaula, lau Fetalai le Faasootauloa. E faigata foi i le Nofoa, o upu lava o le tatou nonofo ai, e tua Vaituutuu i le Falefagamalo. O lea e matou te nonofo atu ai.

Ua manino auofala i lau saunoaga vaeatu le tapuaiga a lo tatou nuu i Vaituutuu. E le toe oo i ai se tala a Matautu. E na o le agaga lena. Talofa e, o tala foi ia sa faalogo i ai. Ua oo lava foi ia te au ua faapena. O le agaga lena o lea e taumafai atu ai se faamatalaga a le Nofoa. O lea ua e saunoa oe le tama matua, lalafo ia i le Atua mea uma. O ia e i ai le faamaoni ma le moni o mea uma.

O faamatalaga e feaveai e le matagi, tatou lafo i nuu le aina. A o le faafofoga a lo tatou nuu ma lo tatou itumalo, Saleaula, o le lauga lena. O lea ua momoli atu le faafetai a le sui usufono mamalu, sui Sinia o Palauli le Falefa, o le lua vanonofo lena. O taga o le aso, ia o le a faaeteete le Nofoa e tautala i ai. Ia a ua logo i tino, logo i le loto lau saunoaga, leaga e faapena foi le mea lea e taoto ia te au. Ae o lea lava e tui le mulipapaga i Afioga Paia a le Atua. O le tali filemu, e liliu ai le alii o le lalolagi ma ana au, ma ana ufanafana. Tuu i le Atua o tatou faamoemoe ua faafofoga mai le itumalo Saleaula, o le agaga lena o le tou sui usufono.

O lea lava e tumau le Nofoa o Saleaula e le i aveesea e oo mai i le aso. Momoli ai le faamalo i le Faigamalalo. Ia tatou tapuaia faiva o lumanai. Tatou lalafo i le lagi e filifili faatasi ma le Atua le itumalo, ina ia faauauina ai pea ia le Nofoa o le tatou nuu. Ia o se faamatalaga lea a le Nofoa, ae faafetai tele mo le saunoaga faa-tama matua. O lea ua faafofoga le Maota ma le atunuu i lou finagalo mama e pei ona aumai ai le moe ma le uta o lenei aso. Manuia le lauga Saleaula.

Tulai mai Palauli le Falefa.

**Afioga Hon FAUMUINA TIATIA FAAOLATANE LIUGA:** Faafetai, faafetai i lau Afioga i le Fofoga Fetalai. Faafetai foi i le tama matua e pei ona fetalai i lenei itula o le aso.

E i ai si mataupu e tasi lea na pau ia te au ae e taua ia leaga e relate agai i i tatou i alo ma fanau ia e a foi ua le oo i luga vasega maualuluga aemaise lava o Iunivesite, le vaega lea e fai ai le polokalame o le RSE. O le taua o le vaega lea, ona o le tele o aiga lea ua faamanuiaina i i le polokalame lea, e le gata ua manaia ia o latou maota, ia ua tele foi taavale, ia ae ua faapena ona faamanuiaina ai, ua alu ai foi i luga le tautuaina o nuu taitasi, ma Ekalesia. O le mea lea e aliali mai i afioaga ia ua faamanuia i le polokalame lea, lau Afioga i le Minisita, lau Afioga Lautafi, faafetai mo le polokalame.

Ia afai e faaopopo pea ma faaopopo pea, ia o lau tuualalo ia faaaoga mai ia afioaga i Pule mamalu a Alii ma Faipule e faauala ai ia tatou au piki nei, ona ia faaititia ai le mea lea o le o atu i le fai ia uiga e le talafeagai i Niu Sila ia ma afaina ai foi ia le tatou vanonofo ai ma lena Malo. Ae faafetai tele mo le vaega lea, ou te iloa tasi lea vaega o le a accomodate ai nai alo ma

fanau ia ua filifili o le a nonofo mai i aoga i luga atu o le Vasega 9, Vasega 10 ae faaoga ai ia alo ma fanau nei. Ae ou te iloa e taua le vaega lea e faatupulaia ai, ia atinae e fai i totonu o afioaga, o alaafaga.

Ia o le tele foi o isi Ekalesia ua faaoga ia saofaga o nei alo ma fanau, e faaleleia ai ia e le gata o faletapu, ia a o halls foi e fai ai ia faatasiga a Ekalesia. Faafetai mo le vaega lea lau Afioga Lautafi...

**Afioga Hon Lautafi Fio Selafi Purcell (Minisita mo Pisinisi, Alamanuia ma Leipa):** Lau Afioga i le Fofoga Fetalai....

**SUI FOFOGA FETALAI:** Malie se i tulai mai le Minisita o feagai tonu ma mea ia e saunoa i ai le sui usufono mamalu.

**Afioga Hon Lautafi Fio Selafi Purcell:** Faafetai i le saunoaga a le sui usufono i le mataupu lea. E pau lava le tulaga ou te fia puea le saunoaga a le sui usufono e faapea e i ai nuu ma alaafaga o lea e o i lalo o le polokalame lea la ua faamanuia.

O le naunautaiga o le Malo, o Samoa atoa lava e manuia. O le taumafaiga foi lena o lea e taumafai i le taimi nei, ia tofufusia lava nuu uma e aumai ia latou tagata e lesitala, ma le avanoa e o ai, avanoa mo tagata uma lava o Samoa. E le faapea e na o nuu ia sa masani ona o, e ave i ai le faamanuiaga lea. O nuu uma lava o Samoa, o le tulaga foi o le auai mai o Alii ma Faipule, o le agaga tonu lava lena. A fai o se augalulue foi lea e aumai i se aulotu, po o se autalavaou, toso mai ai la i i ma Alii ma Faipule e latou te... e pei e latou te aumai le faamalumaluga, o tagata ia o le a o o tagata e lelei ma pulea amio.

Ma e ua iloa foi le lelei tele o tagata nei e o faapea lea e aumai ai le faamanuia a Alii ma Faipule, Faifeau. E o atu lava i o galulue aua foi o lea e i ai le auga lea e o ai, e pei o lau saunoaga fai se hall, fai se falesa, po o ni mea faapena. E leai lava ni mea faatupu vevesi ua maua i tagata faapea. Ae o le naunautaiga lena a le Malo, ia auai mai Alii ma Faipule, Faifeau, tagata uma e opogi le faamoemoe, ia ona o atu foi lea o latou alo i o, ia o la e pulea amio. Ia ma toe foi mai, ia aumai se tupe e atiae ai le nuu, po o le Ekalesia. Ae o le mataupu lea ou te tautala umi atu ai pe a oo i lou taimi, ae faafetai tele i le Afioga i le sui usufono mo le mataupu lea ua ia laga. Ae o le tulaga lena ma le faaaloalo.

**SUI FOFOGA FETALAI:** Faafetai, malo saunoa se i tulai mai le Taitai o le Maota.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Se i toe faaopoopo atu lava ua manino le saunoaga a le Minisita. Sa o matou feiloai lata mai nei foi i nai mataupu e faaleleia atili ai le tulaga lea e le o se faata lea e saunoa i ai

le Minisita. A o lea foi ua nofoilo i le itu e tatau ona toe vaavaai i ai, ona e i ai nai mea ia na tutupu mai.

Ua tatau ona toe vaai atoa lava latou nei e auala atu ai isi i fafo ina ia silafia e i latou na o polokalame o polokalame a le Malo, e pule ai le Malo. Afai foi e latou te faaaoga sese ia le pule lea ua tuu atu i ai ma alu faasalalaua e pei e foliga mai e leai se... ua tutoatasi lava latou faaiuga, o mea uma lava na o le... a faaletonu lava le tagata o lea e faia ia... o lea e fai ia tulaga faapea, e faigofie lava ona toe momotu ese mai, toe foi mai i le Malo, ona e i ai itu o lo o vaai pea o lo o mama ai le puipuiga o lo o tulai mai pea, ma ua tele foi mea ua tulai mai i faitioga ua oo mai. O le tele o taimi e omai sao ia te au i tupe e toese mai le tagata e faigaluega, o isi ua fai lava sina tetele o tupe ua toese, pe toese faamalosi i se auala faaalatua. O le mea la lena o lea ua toe tilotilo i ai le Minisita ma A'u nei ina ia aua ne i i ai se tulaga e lapelapea ai pea le faatinoga o le polokalame.

Ia, o le tulaga lena lau Afioga, a o lena ua saunoa atu le Minisita, e le o malolo le Minisita ma le Matagaluega i le tilotilo toto'a i fesuaiga e tatau ona ai.

**SUI FOFOGA FETALAI:** Malo saunoa i alu Afioga. Masalo o lea ua matua manino lelei e pei ona aumai le faamaninoga e le Taitai o le Malo.

Tulai mai e faaauau lau saunoaga.

**Afioga Hon FAUMUINA TIATIA FAAOLATANE LIUGA:** Faafetai lau Afioga i le Fofoga Fetalai. O le manino ia o le folasaga a le Afioga i le Palemia, e faapena foi le Afioga i le Minisita. O le faamalo e avatu ona o galuega ia, ona o le tele ia o le faaopoopoga o le tamaoaiga o tatou aiga o lo o i ai nei faamanuiaga, ae faafetai atu mo le silasila mamao mo le manuia lautele o si o tatou atunuu.

Ona foi mai lea o sau faamatalaga i se tasi o tatou uso sa tatou galulue faatasi le Afioga ia Vaafusuaga Toleafoa Ken Poutoa. O Vaafusuaga o se meaalofa a le Atua mo Samoa, o se faamanuiaga e le gata i lenei Palemene, a o si ona itumalo. O se sui usufono e fiafia, o se sui usufono e manao e fai lea mea ma lea mea ma lea mea. Sa i ai se isi saunoaga faapea ua faanatinati le faiga o ana galuega, pei o le mea lea ua vave valaaulia ai e le Atua lo tatou uso. Vaafusuaga, e to lou pulou ia te oe, o le matua tele o le aoga. E ui ina puupuu lou taimi i le Palemene o Samoa, ae tele lou sao. Vaafusuaga, manuia lau malaga, afai ou te maua mai, ou te taumafai mai i le Aso Toonai pe a ou malaga atu foi i Salafai i nai tuatuagia faale-itumalo, ae faafetai tele i lou soifua galue ma lou soifua tautua mo Samoa.

E le faagaloina foi lau Afioga i le Fofoga Fetalai le faafetai i Ofisa Sili o Pulega o Matagaluega a le Malo ma Faalapotopotoga Tumaoti i le tautuaina o lenei Palemene, le tautuaina o le atunuu. O lo outou tau, e mai luga. O le faamanuiaga a Palauli le Falefa, o outou uma o Ofisa Sili o Pulega o

Matagaluega ma Faalapotopotoga aemaise aufaigaluega uma a le Malo, so o se mea pai i ai outou lima, ia manuia. Faamanuia le Atua i o outou aiga, faamanuia le Atua i mea tou te fai, e le gata o matafaioi i le tautuaina o le Malo ma le atunuu, a o outou aiga ma Ekalesia o outou galulue ai.

E fai foi lau faafetai i le Komiti Faapitoa lea a le NEOC, ta te nofo lava ma ota tilotilo mai i le TV ia ma faalogologo foi i a outou faasalalaua i alaleo eseese. Faafetai i le Taitaifono, faafetai i Matagaluega uma o lo o fai o latou sao, e le faigofie la outou matafaioi, e tumu i luitau, a o lo outou soifua ma lo matou ola, faaoga e tautua ai si o tatou atunuu. O le a lava le tele po o le itiiti o mea tatou te fai, ia fai i o outou soifua o se faamanuiaga mo Samoa.

E le galo ia au le matou Komiti o Tupe, Aliimalemanu, faafetai. Faafetai mo lou onosai i si ou tuagane, e i ai foi taimi e siisii ai faamatalaga e fai atu, ae faafetai i lou fai tuagane. Toomata, ia ou te iloa o lena e te faafofoga mai i Savaii ona o ou tuatuagia. Namulauulu, Tanuvasa, faamalo galulue.

Ou te faafetai foi i Komiti eseese, Taitaifono ma Sui Taitaifono ma sui o lenei itu o le tatou Maota, faamalo le galulue, faafetai le lagolago i le Kapeneta, faafetai le lagolago i o tatou uso a Minisita Lagolago. Na fai lo outou tiute tou te le i naunau i se taui, ae na outou naunau ia manuia Samoa. Ia avea i tatou o ni auauna e aoga, ia fai ma le poto ma le atamai a tatou faaiuga fai. A oo foi i le taimi o faiga filifiliga, ua uma ona silafia e le Atua i latou ua... O le valaauina o le tagata e le faia e tatou, o le mea mai le lagi. Afai lava ua filifili i tatou e le Atua, e leai se isi na te suia.

Faafetai i le Failautusi o le Fono Aoao lau Tofa Tiatia faapea foi Leatisa ma le aufaigaluega. Faafetai le galulue. E i ai foi taimi e sii atu ai le leo, ae ou te vaai atu lava i lo outou galulue, e ese lo outou naunautai e tautua le Fono Aoao a Samoa.

E faapitoa lau faafetai i le Vaega lea o le IT, le Vaega lea o lea e o atu i le fale i le taimi e fai ai fonotaga a le ACB ma le EU. Ou fai atu i le matou vaega i Brussels, a Taitaifono au, e pule atu au i le taimi e fai ai le fono ae le pule mai outou. Fono po outou ae fono ao au, aua e naunau ina ia faapena ona lava tapena lo tatou sa aua le faatautaiga o fono faava-o-Malo ma saili ai manuia mo Samoa. Faafetai tele, faafetai tele, faafetai tele Tiatia ma Leatisa ma le aufaigaluega.

Ou te faafetai foi i le Vasega o Leoleo o lo o leoina le tatou Fono. Fuiavailiili, le Matagaluega o Leoleo ma Falepuipui, lau Afioga i le Minisita, faafetai tele mo le puipui o le Maota o Samoa. E leai ni manuia o i le sui usufono mo Palauli le Falefa, a ia alofa le Atua e faamanuia atu i le taitaiga o le tatou Matagaluega.

Tuilaepa, faamalo le lototele, faamalo le toa, e te le o alo lava i se mea e manuia ai Samoa. Afioga i Minisita, alii ma tamaitai, faafetai i lo outou lagolago mai, ua leai lava se mea tou te le i tali atu ai i manaoga o le atunuu aemaise foi o si ou itumalo. Faafetai tele mo le lagolago mai.

Lau Afioga i le Fofoga Fetalai ona o ou tuatuagia faale-itumalo, ou te faanoi atu ai mo le aso a taeao, ae o le a ou taumafai ou te faalogologo mai, ona toe sau foi lea o Palauli le Falefa e toe fai sona sao i le Aso Gafua. O lea ua fai atu ia Lealailepule, aua o le mea lena e ala ai ona... foi lele e le manao e alu e faatau mea i le auala, aua foi e faamanaia. Ia manuia lau lauga taeao Lealailepule, o ou mama na. Faafetai. Ia manuia. Faafetai i lau Afioga i le Fofoga Fetalai.

*Na faaalua le agaga fiafia o le Palemene i le patipati o latou aao i le maea ai o le saunoaga a le sui usufono mo Palauli le Falefa.*

**SUI FOFOGA FETALAI:** Ua faamalo saunoa i lau Afioga i le sui usufono mamalu lau Afioga Faumuina Tiatia Faaolatane Liuga, ua se ligoligo lou fofoga i le sau lava i le taeao seia oo i lenei vaega o le aso. Ua faafofoga Samoa ma le Maota i le oa ma le tele o lou sao, o le afua foi lea o le tele o faauilavea ma taumafai le Malo e faamalamalama ma faamanino, o le lelei ona e tapena o le faamoemoe o lenei aso ma le aso ananafi. Matou te le tau selu atu, ia alofagia e le Atua faamanuia i lou tulai mai, e faitau ia te oe nisi o Toe Ulutaia o le Maota lenei, e fai oe ma faataitaiga i le tele o a tatou o tatou mafutaga.

O lea ua momoli lau faamalo ma lau faafetai i le paia o le Malo, le Afioga i le Palemia ma le Aiga Kapeneta, faapea foi Sui Minisita, Taitaifono o Komiti Tumau o le Maota, sui usufono mamalu uma o le Palemene. Tatou ave lea i uta, e fai ma viiga o le Atua i mea lelei ua tatou faia ae faatumauina lo tatou ola faatauva e auauna mo Ia i aso o totoe o le soifua ma le ola. Faamalo tapena, faamalo lauga.

Ou te manatu o lea ua tatou taunuu mai i le faaiuga o galuega o lenei aso, e i ai le talitonuga, o se laolao, a o se avanoa e faaleo ai le agaga faafetai o le Nofoa i le paia maualuga o le Palemene, i le afio o lau Afioga i le Taitai o le Maota lau Afioga i le Palemia, afifio a outou Afioga i Minisita, ae faapea foi Minisita Lagolago, Taitaifono o Komiti Tumau Faa-Palemene, e faapea foi le mamalu maualuga o sui usufono filifilia o le Maota lenei. Faamalo usufono, malo le faatoatoa i lenei aso, malo foi le onosai, aua lo tatou valaauina.

E fia faaleo lava se agaga faamalo ma le faafetai i Ofisa Sili o Pulega o Matagaluega a le Malo ma Faalapotopotoga Tumaoti a le Malo, faafetai tele i lo outou onosai mai, i lo outou usitaia o faatonuga. Aua o le upu moni e tua le Faigamalo i o outou aao. O le molimau ola lea o se Faigamalo mausali, se Faigamalo maopoopo lona faatonufofua. E molimau le Nofoa i lenei aso ma le tele o aso. E momoli ai le faamalo ma le faafetai. Faamanuia le Atua i a outou nafa tausai ma lo outou valaauina aua galuega mo le lelei o le atunuu. Faafetai tele.

Le paia e o Samoa i lau tapuaiga, ia, matou te afe atu e momoli atu le faamalo ma le faafetai. O le upu moni, ua manuia faiva, ua manuia le Fonotaga o lenei aso, ona o la outou tatalo ma la outou tapuaiga mana. O la outou pule lea. O le a se mea ua lelei na faia e le Maota i lenei aso, ia aua ne i viia ai le tagata, ae fai ma viiga o le Atua, ae faatumauiina pea lo tatou faatauva.

Ou te faamalulu atu foi i le paia o le Palemene, le paia o le Maota aemaise o le faafofoga tapuai mai a le atunuu, afai ua sala se upu a le Nofoa, po o sana aga ua le tau tamalii, ou te faamaualalo atu, ui magalo se faaletonu o la outou auauna i la outou faafofoga ma la outou silasila, ae fale i le fale o le Atua e magalo ai mea uma. Ia agalelei pea lo tatou Matai Sili i le lagi aua galuega o lo o faatalitali mai mo i tatou ma toega o lenei aso. Talosoifua i le alofa o le Atua, ae faaauaiina ai le tatou galuega pe a aulia le aso a taeao.

Ae tatou te le i tolopo, ou te tapa ma le faaaloalo le Afioga i le sui usufono mo le itumalo faaalaalafaga o Gagaifomauaga Nu.2 e te saunia se tatalo e faaiu ai galuega o le aso.

*Na tolopo Taulumaga o le Fono Aoaofaitulafono i le itula e 1:02 i le afiafi seia aulia le Aso Faraile, 12 Fepuari 2021 i le itula e 9:00 i le taeao.*